

## **UPU TOMUA**

E mua'i faatalofa ma faafeiloai atu i le paia tele o le Ekalesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Ekalesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomia e se tasi, e aunoa ma le faatagaga a le Ekalesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a mommia.
2. O Mataupu o Tusi Aoga Aso Sa ma Autalavou 2022, ua maua lea i le upega Tafailagi (website) a le EFKS; [www.cccs.org.ws](http://www.cccs.org.ws). Faamolemole ia fesootai mai lo tatou Ofisa i Mulinuu mo se fesoasoani, ma nisi vaega e fia malamalama i ai, i le telefono 24340, po o le [e-meli-extneduc@cccs.org.ws](mailto:e-meli-extneduc@cccs.org.ws).
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faai. Peitai o vaega masani nei e tatau lava ona fai i Mataupu o Aso Sa taitasi. Ua tuuina atu i Tusi Aoga Aso Sa a le Vasega Amata, Vasega Laiti, ma le Vasega Feololo, fati o pese (nota) fou mo nisi o mataupu.
4. Mo le silafia e Tamā o le Ekalesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu īā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lapē i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesoota'i mai lo tatou Ofisa i tuatasi o i luga, pe lafo mai i le Pusa meli 163, Apia.
6. Ua saunia le Tusi Aoga mo le Vasega Amata 2022, e le susuga ia Satala Sa'u FS, faletua ia Temukisa Tanielu, Faanati Matamu ma Eirenei Faau.

Ia faamanuia le Atua i le galuega o lenei tausaga, auā le a'oa'oina o alo ma fanau a le Eklesia, ina ia tutupu a'e ma le fifia e faitau le Tusi Paia ma ola matata'u i le Atua.

Soifua ma ia manuia  
O la outou auauna

*Maleifua Taniesu*  
**(Faatonu A'oa'oga Kerisiano)**

## **MATĀ'UPU VASEGA AMATA 2022**

### **MANATU AOAO IANUARI-FEPUARI: “O le Vala’au a le Atua”:**

**Ianuari 30:** Ua vala’au le Atua ia Atamu (Kenese 3:1-15) mo faiaoga  
(Kenese 3:9) mo tamaiti.

**Fepuari 06:** Ua vala’au le Atua ia Kaino (Kenese 4:8-12) mo faiaoga  
(Kenese 4:9) mo tamaiti.

**Fepuari 13:** Ua vala’auina e Iesu Simona Peteru ma Aneterea e fai mona so’o.  
(Mataio 4:18-22) mo faiaoga  
(Mataio 4:19) mo tamaiti

**Fepuari 20:** Ua valaau Iesu ia Sakaio. (Luka 19:1-10) mo faiaoga  
(Luka 19:5) mo tamaiti

**Fepuari 27:** Ua valaau le Atua ia Mose (Esoto 3:1-6) mo faiaoga  
(Esoto 3:4) mo tamaiti

### **MANATU AOAO MATI – APERILA: “Fa’amatolo ma fa’aola”.**

**Mati 06:** Ua fa’asaoina e Reupena Iosefa. (Kenese 37:12-22) mo faiaoga  
(Kenese 37:21) mo tamaiti

**Mati 13:** Ua fa’amatolo e Iesu le mai supa. (Mataio 9:1-8) faiaoga  
(Mataio 9:6&7) tamaiti.

**Mati 20:** Ua fa’asaoina Mose e le afafine o Farao. (Esoto 2:3-9) faiaoga.  
(Esoto 2:9) tamaiti

**Mati 27:** Ua fa’amatoloina Na’amanu. (2 Tupu 5:8-14) mo faiaoga  
(2 Tupu 5:14) mo tamaiti

**Aperila 03:** O le pipili ua fa’amatoloina. (Galuega 3:1-10) mo faiaoga  
(Galuega 3:6) mo tamaiti

**Aperila 10:** Ua maliu mai Iesu le faaola. (Mataio 21:1-11) mo faiaoga  
**(Aso Sa o le Laupama)** (Mataio 21:9) mo tamaiti

**Aperila 17:** Ua toetu Iesu. (Mareko 16:1-8) mo faiaoga  
**(Aso Sa o le Toetu)** (Mareko 16:6) mo tamaiti

**Aperila 24:** Ua toe faaola e Iesu Lasalo. (Ioane 11:38-44) mo faiaoga  
(Ioane 11:43) mo tamaiti

**MANATU AOAO ME-IUNI: “O tagata ma a latou amio”.**

**Me 01:** Ua le usitai Atamu ma Eva i le Atua. (Kenese 3:1-6) mo faiaoga  
(Kenese 3:6) mo tamaiti

**Me 08:** Ua ataata Sara . (Kenese 18:1-15) mo faiaoga  
**(Aso Sa o Tinā)** (Kenese 18:12) mo tamaiti.

**Me 15: (FONO TELE I MALUA)**

**Me 22:** Aperaamo le tama lelei. (Kenese 13:1-11) faiaoga  
(Kenese 13:8) tamaiti

**Me 29:** O Samasoni le tama malosi. (Faamasino 16:22-31) mo faiaoga.  
(Faamasino 16:30) mo tamaiti.

**Iuni 05:** O Ioane le papatiso (Mataio 3:11-17) mo faiaoga  
(Mataio 3:13) mo tamaiti

**Iuni 12:** O Samuelu le tama usitai (1. Samuelu 4:1-14) mo faiaoga.  
(1. Samuelu 4: 10) mo tamaiti

**Iuni 19:** O Ionatana ose uo lelei. (1. Samuelu 18:1-5) mo faiaoga.  
(1. Samuelu 18:4) mo tamaiti

**Iuni 26:** O le auauna faamaoni. (Mataio 25:14-16) mo faiaoga  
(Mataio 25:16) mo tamaiti.

**MANATU AOAO O IULAI MA AOKUSO: “Mafutaga i totonu o aiga”.**

**Iulai 03:** O le alofa o le tamā. (Luka 15:11-24) mo faiaoga  
(Luka 15:20) mo tamaiti

**Iulai 10:** O le atali’i ua salamo. (Luka 15:21)

**Iulai 17:** O le tamaitiiti poto. (Faataoto 1:7)

**Aokuso 07:** O le tina fai mea lelei. (Mataio 26:6-13) mo faiaoga  
(Mataio 26:7) mo tamaiti

**Aokuso 14:** Ia iloa e matua le mea o lo'o e i ai. (Luka 2:41-48) mo faiaoga  
**(Aso Sa o Tamā)** (Luka 2:48) mo tamaiti

**Aokuso** 21: E fiafia matua pe a popoto le fanau. (Faataoto 10:1)

**Aokusō** 28: O le Atua alofa i tagata. (Ioane 3:16)

**MANATU AOAO SETEMA-OKETOPA:** “O vavega na faia e Iesu”.

**Setema 04:** Ua fafagaina e Iesu tagata e toatele. (Mataio 14:13-21) mo faiaoga. (Mataio 14:19) mo tamaiti

**Setema 11:** Ua savali Iesu i luga o le vai. (Mataio 14:22-27) mo faiaoga (Mataio 14:19) mo tamaiti

**Setema 18:** Ua pupula mata o tauaso. (Mataio 20:29-34) mo faiaoga.  
(Mataio 20:34) mo tamaiti

**Setema 25:** Ua fa'amalolo e Iesu le tagata ua gase lona lima. (Mareko 3:1-6)  
mo faiaoga. (Mareko 3:5) mo tamaiti.

**Oketopa 02:** Ua fa'alogo le tagata tutuli ma logonoa. (Mareko 7:31-37 )  
mo faiaoga. (Mareko 31:35) mo tamaiti

## **Oketopa 09: LOTU TAMAITI**

**Oketopa** 16: Ua fetu'u e Iesu le mati. (Mareko 11:12-14) mo faiaoga  
(Mareko 11:14) mo tamaiti

**Oketopa 23:** Ua faamalolo e Iesu le taliga o le fitafita. (Luka 22:47-53)  
mo faiaoga. (Luka 22:51) mo tamaiti

**Oketopa** 30: O Iesu ma le tama ua oti. (Luka 7:11-17) mo faiaoga  
(Luka 7:14) mo tamaiti

## **MANATU AOAO O NOVEMA MA TESEMA: “O le Atua alofa”**

**Novema 06:** Ua savavali Isaraelu I le sami matutū. (Esoto 14:15-22) faiaoga  
(Esoto 14:22) tamaiti

Novema 13: Ua laveai e le agelu Elia. (1. Tupu 19:1-8) faiaoga.  
(1.Tupu 19: 6) tamaiti

**Novema 20:** Ua alofa le Atua ia Lota ma lona aiga.(Kenese 19:1-19) faiaoga  
(Kenese 19:16) tamaiti

**Novema 27:** Ua faamanuia le Atua ia Iopu. (Iopu 42:1-17) faiaoga  
(Iopu 42:12 & 13) tamaiti.

**Tesema 04:** Ua alofa Iesu i tamaiti. (Mareko 10:13-16) faiaoga  
(Mareko 10:14) tamaiti

**Tesema 11:** O le alofa silisili o le Atua. (Luka 2:8-13) faiaoga  
(Luka 2:10-11) tamaiti

## **“MANUIA LE TAPENAINA O MATAUPU”**

## **MANATU AOAO: E I AI LE ATUA I SO O SE MEA**

### **MANATU TAIALA O IANUARI & FEPUARI: O LE VALAAU A LE ATUA**

Ua filifilia le manatu taiala e pei ona tā'ua i luga, e fa'a-autū i ai Mata'upu o lenei masina. O le fa'amoemoe maualuga, ina ia a'oa'oina le fanau ina ia usita'i ma fa'alogi i so o se galuega ua vala'auina ai i tatou e galulue ai, aua se latou lumanai manuia, ae le gata i lea, o aiga, nu'u, ma Ekalesia.

**ASO SA:** **30 IANUARI 2022**

**MATAUPU:** **UA VALA'AU LE ATUA IA ATAMU**

**SINI:** Ia malamalama le vasega, na vala'au le Atua iā Atamu, ina ia galue ma leoleo i le fa'atoaga i Etena.

**TUSI FAITAU:** Kenese 2: 8 – 17 (mo le Faiaoga)  
Kenese 2: 16 & 17 (mo le Vasega)

*Ua fetalai atu foi le Ali'i le Atua i le tagata, o lo o fa'apea atu, "O la'au uma o i le fa'ato'aga e te 'ai ai. A o le la'au e iloa ai le lelei ma le leaga, 'aua e te 'ai ai; auā o le aso e te 'ai ai, e te oti ai lava".*

#### **FESOOASOANI MO FAIAOGA:**

Ina ua uma ona faia e le Atua o mea uma o le foafaoga atoa ai ma le tagata, ona ia faia lea o le fa'atoaga i Etena i Sasae, ma tu'uina i ai le tagata na Ia faia.

Ua fa'atupuina e le Atua la'au uma e matagofie i le va'ai, ma la'au e 'aina o latou fua i le fanua. Na tafe foi le vaitafe mai Etena i ona ala 'ese'ese, ua avea ai ma vaitafe e fa e fa'asūsūina ai le fa'atoaga. O igoa o vaitafe o Pisaona, o Kaiona, o Hitekelu ma Eufirate. Ua ave foi e le Atua le tagata, ma tu'u i le fa'atoaga i Etena e galue ma leoleo ai.

Ua fetalai atu foi le Atua i le tagata, o Atamu lea, "O la'au uma o i le fa'atoaga e te 'ai ai. A o le la'au e iloa ai le lelei ma le leaga, 'aua e te 'ai ai; auā o le aso e te 'ai ai e te oti ai lava."

Tamaiti, o le vala'au a le Atua iā Atamu, ina ia nofo lelei i le fa'atoaga i Etena e galue ai ma leoleo le fanua. Ua ia fa'atagaina foi ona 'ai i so o se la'au po o fua o la'au o lo o ola i le fa'atoaga, ae se'i vagana ai le la'au e tasi, e fa'asā ona ia 'ai ai.

**GALUEGA FA'ATINO:** Valivaligā Ata

Ia fai ni kopi o le ata ua saunia e tufa i le vasega e galulue ai.

**PESE: (Fati: Aue le namu e ese lou le alofa)**

1. Aue le gata e ese lou le leaga  
Lou fa'aosooso o le uluai tagata  
Ua e fai i ai, e tago e ai  
Le la'au ua uma ona fa'asa mai \*2

2. Fa'alogo ma usitai' i le Atua i le lagi  
E manuia ai lou olaga i le lumanai  
Ae aua ete fa'alogo i le tiapolo  
O ia lena na sau e fa'asese i o ta loto \*2

**A'OA'OGA:**

1. Ia usita'i i le vala'au mai o le Atua.
2. E lelei le Atua





**ASO SA:** **6 FEPUARI 2022**

**MATAUPU:** **UA VALA'AU LE ATUA IĀ KAINO**

**SINI:** Ia malamalama le vasega, na vala'au le Atua iā Kaino, po o fea o i ai lona uso o Apelu.

**TUSI FAITAU:** Kenese 4: 8 – 12 (mo le Faiaoga)  
Kenese 4: 9 (mo le Vasega)

*Ua fetalai atu le Ali'i iā Kaino. O fea o i ai Apelu lou uso? Ona tali mai lea o ia, Ou te le iloa; o a'u ea le leoleo o lo'u uso?*

**FESOASOANI MO FAIAOGA:**

O Kaino ma Apelu, o le fanau lea a Atamu ma Eva. E ulumatua Kaino, ae la'itiiti Apelu. Ina ua uma ona fai la taulaga i luma o le Atua, ma ua silasila foi le Atua i le taulaga a Apelu. Ae peitai, o le taulaga a Kaino, e le'i fia silasila i ai le Atua.

O le mafua'aga tonu lena na ita ai Kaino i lona uso o Apelu, ma ia fa'ao'o ai le oti ia te ia. Ona fetalai atu ai lea o le Ali'i iā Kaino, "O fea o i ai lou uso? Ona tali mai lea o Kaino, "Ou te lei iloa; o a'u ea le leoleo o lo'u uso? Ua silafia lelei e le Atua le mea leaga na fai e Kaino i lona uso o Apelu, o lea na ia fa'asala ai loa iā Kaino.

Afai e galue o ia i le 'ele'ele, e lē toe fua lelei mai ona fua ia te ia. E avea foi o ia ma maumausolo ma fa'asevasevaloaina i le lalolagi. O lona uiga, e le mautū se nofoaga e nofo ai. E fealualua'i solo i lea mea ma lea mea, o lea nu'u ma lea nu'u.

Tamaiti, o le iuga lena o le tagata e le fai mea lelei mo le Ali'i. E le maua foi e ia ni fa'amanuiaga mai le Ali'i.

**GALUEGA FAATINO:** Taliga Fesili

1. O ai le igoa o le uso o Apelu?

Tali: O Kaino

2. O ai na fia silasila i ai le Atua i lana taulaga?

Tali: O Apelu

3. O le a le vala'au a le Atua ia Kaino?

Tali: Kaino, o fea o i ai Apelu lou uso?

**PESE: (fati: tasi lima matua gaioi)**

1. O Kaino o le tama ulumatua  
Atamu ma Eva o ona matua  
Na ia fasioti Apelu lona uso lona lua  
Ua le fiafia mai ai le Atua

2. Le Atua ua fetalai ia Kaino  
O fea o i ai Apelu lou uso  
O le a avea oe ma maumausolo  
E leai se filemu i lou loto

### A'OA'OGA:

1. Na vala'au le Atua iā Kaino po o fea o i ai lona uso o Apelu.
2. Tatou fiafia e fai mea lelei mo le Atua.





St-Takla.org

**ASO SA:** **13 FEPUARI 2022**

**MATAUPU:** **UA VALA'AUINA E IESU SIMONA PETERU MA ANETEREIA E FAI MONA SO'O.**

**SINI:** Ia malamalama le vasega, na vala'auina Simona Peteru ma lona uso o Aneterea e Iesu e fai mona so'o.

**TUSI FAITAU:** Mataio 4: 18 – 20 (mo le Faiaoga)  
Mataio 4: 19 (mo le Vasega)

*“Ona fetalai atu lea o ia ia te i la’ua, “Inā mulimuli mai ia ia te a’u, ou te faia oulua ma faifaiva i tagata”.*

#### **FESOASOANI MO FAIAOGA:**

A o savali ane Iesu e latalata ane i le vai i Kalilaia, ona ia iloa atu ai lea o Simona ua igoa ia Peteru, ma lona uso o Aneterea, o lo o lafo le la upega i le vai, auā o tagata fai faiva i la’ua.

Ona fetalai atu lea o Iesu ia te i la’ua, “Inā mulimuli mai ia ia te a’u, ou te faia oulua ma fai faiva i tagata.” O le uiga o le fetalaga a Iesu, ia ‘aua nei toe o i la’ua nei e fai faiva e maua ai ni i’ā. ae ia ī e fai faiva e maua ai ni tagata e tala’i atu i ai le Tala Lelei iā Iesu Keriso, ma faia le finagalo o lo tatou Tamā o i le lagi. Ona la tu’ua loa lea o la’ua upega, ae ua mulimuli atu iā Iesu.

Ioe tamaiti, na ona vala’au atu lava o Iesu ia Simona Peteru ma lona uso o Aneterea e mulimuli atu ia te Ia, tu’u uma loa a la galuega na fai ae mulimuli atu ia te Ia. Ua la talia ma le fiafia le vala’auina o i la’ua atoa ai ma lo la’ua usitai iā Iesu.

#### **GALUEGA FA’ATINO:** Fa’atino le tala

Ia fa’atino e le faiaoga ma le vasega le tala ua saunia i le Mata’upu.

**PESE:** Ou te faia outou, ma faifaiva i tagata  
(I will make you fishers of men)

#### **A’OA’OGA:**

1. Ua talia e Peteru ma Aneterea le valaau a Iesu.
2. Ia tatou usiusitai ma fa’alogo i o tatou matua.

**“Ou te faia oulua ma faifaiva i tagata”.**



**a alamy stock photo**



**FOLLOW ME,  
AND I WILL MAKE YOU**



**FISHERS OF MEN.  
MATTHEW 4:19**



**ASO SA:** **20 FEPUARI 2022**

**MATAUPU:** **UA VALA'AU IESU IA SAKAIO**

**SINI:** Ia malamalama le vasega, na vala'au Iesu iā Sakaio a o i luga o le la'au o le suka moru.

**TUSI FAITAU:** Luka 19: 1 – 10 (mo le Faiaoga)  
Luka 19: 5 (mo le Vasega)

*Ua o'o atu Iesu i lea mea, ona tepa a'e lea o Ia, ua silafia o ia, ona fetalai atu lea ia te ia. "Sakaio e, ia e vave ifoifo ia i lalo, aua e tatau ona ou nofo i lou fale i le aso nei."*

**FESOASOANI MO FAIAOGA:**

Ua o'o atu Iesu i le a'ai o Ieriko, sa toatele tagata o lea a'ai sa latou fia maimoa ma va'ai iā Iesu. Sa i ai foi le tagata e igoa iā Sakaio. O Sakaio, o le tagata sa'asa'a, po o le tagata pu'upu'u. O ia foi o se tagata mau'oa, o le ao lafoga sili i le a'ai. E o mai tagata uma o le a'ai e totogi ia te ia a latou lafoga (tax) mo le malo o Roma.

Sa naunau lava Sakaio i le fia va'ai iā Iesu, ae peitai, ua lē mafai i le toatele o le motu o tagata, ona o ia o le tagata pu'upu'u. O le ala tonu lava lea sa ia momo'e atu ai i luma, ma a'e i luga o le la'au o le suka moru, ina ia mafai ona ia iloa atu Iesu pe a ui ane o Ia.

Ua o'o atu Iesu i lea mea, ma iloa atu o ia, ona fetalai atu lea o Iesu ia te ia, "Sakaio e, ia e vave ifoifo ia i lalo, auā e tatau ona ou nofo i lou fale i le aso nei." Ona vave alu ifo ai lea o ia ma le fia fia.

**GALUEGA FAATINO:** Fa'atino le Tala


Ia fa'atino e Faiaoga ma le vasega le tala e pei ona saunia i le Mata'upu.

**PESE:** Sakaio le tagata pu'upu'u sa'asa'a

**A'OA'OGA:**

1. Ua talia ma le fia fia e Sakaio le vala'au a Iesu.
2. E saili mai Iesu ia i tatou.

UA VALA'AU IESU I A SAKAIO



**ASO SA:** **27 FEPUARI 2022**

**MATAUPU:** **UA VALA'AU LE ATUA IA MOSE**

**SINI:** Ia malamalama le vasega, na vala'au le Atua ia Mose mai le afi mumū i totonu o le la'au talatala.

**TUSI FAITAU:** Esoto 3: 1 – 6 (mo le Faiaoga)  
Esoto 3: 4 (mo le Vasega)

*Ua silafia e le Ali'i ua afe ane ia e maimoa, ona vala'au mai lea o le Atua ia te ia nai totonu o le la'au talatala, ua fetalai mai, Mose, Mose e! ona fai atu lea o ia, O a'u lenei.*

**FESOASOANI MO FAIAOGA:**

I le tasi aso a o leoleo Mose i le lafu mamoe a Ietero le tamā o lana avā, ua o'o atu i le mauga o Horepa, ona ia va'aia lea o se mea ua ofo tele ai.

O le la'au talatala o lo o mu pea totonu i le afi, ae lē fa'aumatia. Ona ia fa'apea lea, o le a ia afe atu ma maimoa i ai, pe aisea ua lē susunuina ai le la'au. Ua latalata atu o ia i le la'au, ae fa'alogoina loa se vala'au mai totonu o le la'au ua fa'apea mai, "Mose, Mose!" Ona tali atu lea o ia, "O a'u lenei." Ona fetalai mai lea o le Atua, "Aua e te fa'alatalata mai i'inei; inā to ese ia ou se'evae i ou vae, auā ua sā lava le 'ele'ele o lo'o e tu ai.

Ua ia fa'apea mai foi, "O a'u o le Atua o lou tamā, o le Atua o Apera'amo, o le Atua o Isa'ako, o le Atua foi o Iakopo. Ona ufitia lea e Mose o ona mata, auā ua fefe i va'ai atu i le Atua.

**Uiga o Upu:**

- a) maimoa - va'ava'ai. matamata
- e) fa'aumatia - pe, leai se ola, mate
- i) to ese - ave'ese

**GALUEGA FA'ATINO:** Valivaliga Ata

Ia fai ni kopi o le ata ua saunia e tufa i le vasega e galulue ai

**PESE: (fati; youtube: dave and ava :ice cream song)**

1. O Mose, leoleo, i mamoe a Ietero

Ua ofo i le mea ua vaai i ai

Le la'au ua mu ae le pe ai

2. O le Atua ua vala'au mai,

Mose ou se'evae alofa e talai

Ua sa le 'ele'ele o lo'o e tuai

Mose ua musu e va'ai i ai.

## A'OA'OGA:

1. Na vala'au le Atua iā Mose.
2. Ia lelei la tatou faalogo i le vala'au a matua.



**Ua vala'au le Atua ia Mose.**



**Making of a Mighty Man**

## **MANATU TAIALA O MATI & APERILA: FA'AMALOLO MA FA'AOLA**

Ua avea le manatu ta'iala o lo o tā'ua i luga e fa'aautu i ai Mata'upu o masina o Mati ma Aperila, e ala i fa'amalologa ma le mana fa'aola o lo tatou Ali'i i le lagi, e pei ona molimauina i tala o le Tusi Paia ua saunia ma tapenaina.

**ASO SA:** **6 MATI 2022**

**MATAUPU:** **UA FA'ASAOINA IOSEFA E REUPENA**

**SINI:** Ia malamalama le vasega, na fa'asaoina e Reupena le ola o Iosefa mai lima o ona uso.

**TUSI FAITAU:** Kenese 37: 12 – 22 (mo Faiaoga)  
Kenese 37: 21 (mo le Vasega)

*Ua fa'alogo ai Reupena, ma na lavea'i iā te ia ai o latou lima, ua fai atu foi, 'aua le fasioti iā te ia.*

### **FESOASOANI MO FAIAOGA:**

Na o atu atali'i o Iakopo e leoleo i a latou mamoe i Sekema, ma ua o'o atu foi i le fanua o Totana. Ona tofia lea e Iakopo o Iosefa e alu e asiiasi i ona uso, po o a mai i latou ma a latou lafu manu.

Na latou iloa mamao mai o ia, o lo o sau iā te i latou, ona latou taupulepule lea e fasioti iā te ia. Ua latou talatalanoa ma fa'apea ane, "Fa'auta, o lo'o sau lena ali'i fai miti; o lenei, o mai ia, ina tatou fasioti iā te ia, ma lafo i se tasi lua, ma tatou fa'apea ane, ua 'aina o ia e se manu fe'ai.....

Ua fa'alogo ai Reupena le uso matua, ona ia lavea'i lea iā te ia ai o latou lima. Ma fai atu, 'Aua le fasiotia o ia; tu'u ia iā te ia i lenei lua o lo o i le vao, ae 'aua le o'o se lima iā te ia. O lona manatu, ia lavea'i iā te ia, ma toe fa'afou atu Iosefa i lona tamā.

**GALUEGA FA'ATINO:** Valivaliga Ata


Ia fai ni kopi o le ala ua saunia e tufa i le vasega e galulue ai.

### **PESE: (fati; youtube: once i got a fish alive)**


1. Silasila ia ali'i  
Ua sau le tama fai miti  
Tatou fasi ia te ia,  
Ma tu'u i lenei lua
  
2. Petai o Reupena,  
Fa'asaoina mai Iosefa  
Aua le fasiotia  
Ae tu'u ai i lenei lua.

## A'OA'OGA:

1. Ia e alofa i lou uso.
2. Ua alofa Reupena iā Iosefa.



*Ua fa'asaoina Iosefa e Reupena.*



**ASO SA:** **13 MATI 2022**

**MATAUPU:** **UA FA'AMALOLO E IESU LE MA'I SUPA**

**SINI:** Ia malamalama le vasega, o Iesu o Ia o le pule i mea uma.

**TUSI FAITAU:** Mataio 9: 1 – 8 (mo Faiaoga)  
Mataio 9: 6 – 7 (mo le Vasega)

*“...Ina tulai ia, ma ave lou moega, ma alu i lou fale.” Ona tulai ai lea o ia, ua alu i lona fale.*

**FESOASOANI MO FAIAOGA:**

Ua maliu atu Iesu i lana lava a'ai, fa'auta foi, ua o mai tagata ma latou aumai ia te ia le tagata o lo o maua i le ma'i supa, o lo'o ta'oto i le moega. Ua latou aumai le supa iā Iesu ina ia fa'amaloloina. A o Iesu, ua ia silafia lo latou fa'atuatua, ona fetalai atu ai lea o ia i le supa, “Lou atali'i e, ina fa'alototele ia oe, ua fa'amagaloina au agasala.”

Sa i ai fa'atasi i lea mea nisi o le au tusiupu, (o tagata nei latou te tete'e i a'oa'oga ma fetalaiga a Iesu, atoa ai ma ana fa'amalogia) ua latou le fiafia ia Iesu ma lana fetalaiga na fai i le supa. Ua latou fa'apea ane, Ua faifai lenei tagata i le Atua. A o Iesu, ua na silafia mea uma ua latou manatunatu i ai, ona fa'apea atu lea o ia, “Se a le mea ua manatunatu leaga ai o outou loto?” Ae peitai, ina ia iloa e outou o i ai le Atali'i o le tagata i le lalolagi le pule e fa'amagalo ai agasala.

Ona fetalai atu ai lea o ia i le supa, “Ina tulai ia, ma ave lou moega, ma alu i lou fale. Ona tulai ai lea o ia, ua alu i lona fale ma le fiafia.

**Uiga o Upu:**

i) supa - o le ma'i ua le mafai ona gaioi le tino


**GALUEGA FA'ATINO:** Tala Fa'atino

Ia fa'atino e le vasega le tala ua saunia i le mata'upu.

**PESE:** O lima o Iesu o lima agalelei/Jesus hands were kind hands

**A'OA'OGA:**

1. Na fa'amalolo e Iesu le ma'i supa
2. E fa'amalolo e Iesu tagata mama'i.
3. O Iesu tatou te malolo ai.



Matthew 9, 1-8

**ASO SA:** **20 MATI 2022**

**MATAUPU:** **UA FA'ASAOINA MOSE E LE AFAFINE O FARAO**

**SINI:** Ia malamalama le vasega, na faasaoina e le afafine o Farao le pepe o Mose.

**TUSI FAITAU:** Esoto 2: 1 – 10 (mo Faiaoga)  
Esoto 2: 9 (mo le Vasega)

*Ona fai atu lea o le afafine o Farao ia te ia, Ia e ave lenei tama ma tausi i ai ma a'u, ou te avatu ai foi ia te oe le totogi; ona ave lea o le tama e le fafine, ma na tausia.*

### **FESOASOANI MO FAIAOGA:**

I le taimi a o tulai mai le tupu sauā e igoa ia Farao i le nuu o Aikupito, na fai ai lana poloaiga ina ia fasiotia uma tama tane Eperu e toe fananau mai. O le taimi tonu lava lea na fanau mai ai le pepe a se tasi o fafine Eperu. O le faapogai o lea poloaiga, ina ia faaitiitia ai tama tane Eperu, nei faasaga tau mai ia te i latou i ni aso o i luma.

Sa mafaufau le tinā o lenei pepe i se togafiti e faasaoina ai lana tama, auā ua lē toe mafai ona nana o ia, ona ua leo tele le tagi a le tama. O lea na ia lalagaina ai loa le ato kome. Ua ia fuafuaina lava le taimi e alu ane ai le taelega a le afafine o Farao ma lana galu teine, ma o le taimi tonu lava lea na ia faatafetafea atu ai le ato kome, o lo o i ai lana pepe i totonu. Na o mai galu teine ma ave le ato i le afafine o Farao, ma tatalaina loa i ona luma. Na faateia o ia i le vaai atu i se tamaitiiti lalelei.

Ua saili solo se fafine na te tausia le pepe. Ua maua mai le fafine Eperu o Iokapeta, ma o le tinā moni foi lea o le pepe, ua toe ave i ai na te tausia. Ona fai atu lea o le afafine o Farao ia te ia, Ia e ave lenei tama ma tausi i ai ma a'u, ou te avatu ai foi ia te oe le totogi; ona ave lea o le tama e le fafine, ma na tausia. Ua ia faaigoa foi ia te ia, o Mose, auā ua ia faapea, Auā na ou toina a'e o ia nai le vai.

### **Uiga o Upu:**

i) ato kome - o le laau e ola i auvai.

**GALUEGA FAATINO:** Valivaliga Ata

Ia fai ni kopi o le ata ua saunia e tufa i le vasega e galulue ai.

### **PESE: (Lota Lota Tavita le kitara).**

1. Mose, Mose, tu'u i le ato kome,  
Fa'atafea i le vaitafe, i le vaitafe  
Maua o ia ma ua fa'asao  
E le afafine o le tupu o Farao.

## A'OA'OGA:


1. Na fa'asaoina e le afafine o Farao le pepe o Mose.
2. E alofa le Atua iā i tatou.
3. E fesoasoani mai le Atua iā i tatou i taimi uma.



Exodus 2: 1-10

©hatueyart.com

## UA FA'ASAOINA MOSE E LE AFAFINE O FARAO.



**Exodus 2**

**ASO SA:** **27 MATI 2022**

**MATAUPU:** **UA FA'AMALOLOINA NA'AMANU**

**SINI:** Ia malamalama le vasega, o le vaitafe o Ioritana na fufui ai le tino ma'i o Na'amanu, ma mamā ese ai lona lepela.

**TUSI FAITAU:** 2 Tupu 5: 1 – 14 (mo le Faiaoga)  
2 Tupu 5: 14 (mo le Vasega)

*Ona alu ifo ai lea o ia, ua fufui fa'afitu i Ioritana, e tusa ma le upu a le tagata o le Atua, ona foi mai ai lea o lona tino tuai pei o le tino o le tama itiiti, ua mama foi ia.*

**FESOASOANI MO FAIAOGA:**

O Na'amanu, o ia o le ta'ita'i 'au a le 'au tau a Suria. O se tagata e toa ma malosi. E maua o ia i le ma'i o le lepela. Ona aumai lea e le 'au tau a Suria le tasi teineitiiti o le taua mai Israelu, ua fai ma auauna a le avā a Na'amanu. Ua iloa e le teneitiiti o lo o maua Na'amanu i le ma'i lepela, ona ia fai atu lea i le avā a Na'amanu, "O lo o i ai le Perofeta i Israelu, atonu e maua ai se fesoasoani mo le ma'i o Na'amanu.

Ua fa'alogi i ai le tupu o Suria, ona ia ave lea o le tusi i le tupu o Israelu, ina ia fa'ate'a le ma'i lepela o Na'amanu. Ua alu le malaga a Na'amanu ma tu'uina atu le tusi i le tupu o Israelu, ona ita ai lea o le tupu ma saei ona ofu. Ona fai atu lea o Elisaia le tagata o le Atua, "Se a ea le mea ua e saei ai ou ofu? Inā sau lava ia iā te a'u" ua ta'u atu e Elisaia i lana auauna, ia alu e fa'aihoa atu ia Na'amanu, e alu e ta'ele fa'afitu i le vai i Ioritana, ona te'a ese ai lea o le ma'i lepela mai lona tino.

Ua fa'aihoa atu ia Na'amanu le mea e fai, peitai, ua ita Na'amanu ma fa'apea ane, e tatau ona sau i fafo Elisaia ma vala'au i le suafa o le Ali'i lona Atua, ma talo lona lima ona fa'ate'a ese ai lea o le lepela mai lona tino. Ua lē fiafia lava Na'amanu ma toe fo'i atu i Suria, ae peitai, ua o ane nisi o ana auauna ma tauanau o ia, ina ia usitai i le fa'atonuga a Elisaia, atonu e mamā ai lona ma'i lepela. Ona alu ifo lea o Na'amanu, ua fufui fa'afitu lona tino i le vai i Ioritana, ona te'a 'ese ai lea o le ma'i lepela mai i lona tino.

**Uiga o Upu:**

- i) lepela - ma'i o le pa'u pei ni po'u
- ii) Perofera - auauna a le Atua

**GALUEGA FA'ATINO:** Valivaliga Ata

Ia fai ni kopi o le ata ua saunia e tufa i le vasega e galulue ai.

**PESE: (fati: youtube: Six little ducks)**


1. O Naamanu o le taitai au  
Na faaletonu lona mafaufau  
Ina ua faatonuina e Elisaia  
E alu e tofu fa'afitu i le Ioritana

2. Ae na usitai lava i le perofeta  
Ma alu ai loa o lana taelega  
Na ia iloa ai lea o le vavega  
Ina ua mama ai o lona lepela
  
3. E taua le usitai i le Atua  
Ia usitai foi i matua  
O le finagalo moni lea o le Atua  
E fa'amanuia ai ia i taua.

### A'OA'OGA:

1. O le alofa o le Atua e ala mai i ana auauna.
2. Tatou usitai i le Atua.
3. Ua te'a le ma'i lepela o Na'amamu.





**MATAUPU: O LE TAGATA PIPILI UA FA'AMALŌLŌINA**

**SINI:** Ia malamalama tamaiti o le suafa o Iesu e malōlō ai ma'i.

**TUSI FAITAU:** Galuega 3:1-10 (mo Faiaoga)  
Galuega 3:6 (mo le Vasega)

*“A ua fai atu Peteru, ‘E leai sa’u auro po’o sa’u ario; a’o le mea ua ia te a’u, ou tea vatu lea ia te oe; o le suafa o Iesu Keriso le Nasareta, ou te fai atu ai, ina savali ia”.*

**FESOASOANI MO FAIAOGA:**

O le tatou mata’upu la o le Aso Sa lenei, “O le tagata pipili ua fa’amaloloina”. O le tagata pipili, o le tagata lea ua le mafai ona savali. O lona uiga, ua le mafai ona o’o atu i se isi nofoaga e fia alu i ai, ona ua le mafai ona savali.

E tele la tagata pipili o lo’o ta’ua i le Tusi Paia, na fa’amaloloina e Iesu. Ae o le tagata pipili lea o lo’o ta’ua i le tatou tala, e le i fa’amaloloina e Iesu, ae na fa’amalolo e Peteru ma Ioane. O le tamaloa lea, faimai ua fai ma masani a lona aiga, le si’i mai o ia ma fa’anofo i luma o le falesa, e aisi ai i tagata mo ni tupe.

O le isi la Aso Sa, faimai na ō ai so’o ia o Peteru ma Ioane i le lotu, ae tau atu ai i le tagata pipili lea o nofo i luma o le falesa. Sa aisi ifo le tagata lea ia Peteru ma Ioane, pe maua atu se tuge ma ia, ae faimai le tali a Peteru, “E leai sa’u ario po’o sa’u auro; a’o le mea ua ia te a’u, ou te avatu lea ia te oe; o le suafa o Iesu Keriso o le Nasareta, ou te fai atu ai, ina savali ia”.

Faimai na tu i luga le tagata pipili, ua mafai ona savali. Na alu i totonu o le falesa ua oso i luga ma fa’afetai i le Atua, ona ua malolo. E le’i faia e Peteru ma Ioane ni togafitiga, ae na o le suafa lava o Iesu na ta’u atu e Peteru ma fai loa i le pipili e tu i luga. E ese le malosi o le suafa o Iesu atoa ma lona mana, e malolo ai ma’i.

**GALUEGA FAATINO:** Fa’atinoga o le tala.

E lelei ona fa’atino muamua e a outou susuga i faiaoga le tala, ona tu’u ai lea o le avanoa e fa’atino e le fanau, ae fesoasoani i ai susuga i faiaoga.

**PESE:**

Auro ma ario e leai,  
A’o lē o ia te a’u oute avatu.  
O le suafa o Iesu,  
Le Nasareta tulai ia ma savali.

Iesu le Nasareta faafetai,  
O lou mana ua ou malolo ai,  
I le tele o tausaga o ou pipili i lenei ma’i  
A’o lenei ua ou tulai ma savali.

**Tali:** Savali ma oso ma vivi'i i le Atua x2  
O le suafa o Iesu,  
Le Nasareta tulai ia ma savali.

**A'OA'OGA:**

1. Ua savali le pipili.
2. E malosi le suafa o Iesu.





**ASO SA:** **10 APERILA 2022**

**MATAUPU:** **UA AFIO MAI IESU LE FA'AOLA**

**SINI:** Ia malamalama le fanau o le afio mai o Iesu i lana malaga fa'atupu, o le fa'ataunu'uina o le fa'aolataga mo le lalolagi.

**TUSI FAITAU:** Mataio 21: 1 – 11 (mo Faiaoga)  
Mataio 21: 9 (mo le Vasega)

**“O le motu o tagata ua muamua, ma e ua mulimuli, ua alalaga i latou, ua fa’apea mai, ‘Osana i le alo o Tavita; ia manuia le afio mai i le suafa o le Alii. Osana i mea aupito i luga”.**

#### **FESOASOANI MO FAIAOGA:**

O le Aso Sa lenei, ua ta'ua o le Aso Sa o le malaga fa'atupu a Iesu i Ierusalem, ia po'o le Aso Sa foi o le laupama. Aua o le Aso lenei e fa'amanatu ai le malaga a Iesu i Ierusalem, lea na ti'eti'e ai Iesu i le asini, ae ua ò ane tagata ma lau o le la'au o le pama, ua fola ai le auala.

Ua le gata la ina latou fola le auala i laupama ma o latou ofu, ae ua latou alalaga fo'i, “Osana! i le alo o Tavita; ia manuia le afio mai i le suafa o le Ali'i, osana i mea aupito i luga”. O upu ia na alalaga ai tagata. Ae o le uiga o le upu Osana, e pei ona ou ta'ua i luga, o le fa'aola mai. O lona uiga o le vala'au lea na valaau ai tagata ia Iesu, “Osana!” o la na vala'au ia Iesu e fa'aola mai i latou.

O le mafua'aga lena o le afio mai o Iesu, na afio mai e fa'aola le lalolagi e aofia ai ma tatou, mai i le agasala. O le vaiaso la lenei i le Aso Faraile, lea o le a fa'amanatu ai foi, le maliu o Iesu, mo le fa'aolaina o tatou uma lava.

#### **UPU FAAMALAMALAMA:**


- i) Alalaga:- vala'au leotetele
- ii) Osana:- fa'aola mai
- iii) Alo:- atali'i
- iv) Afio mai:- sau

#### **GALUEGA FA'ATINO:**

Fa'atino le malaga fa'atupu a Iesu e susuga i faiaoga fa'atasi ma tamaiti. E lelei ona a'o muamua le alalaga a tagata i tamaiti, ina ia tauloto e tamaiti, ona fa'atino ai lea o le tala. A mae'a, ona usu fa'atasi lea e tamaiti ma susuga i faiaoga le pese masani o le Aso Sa o le laupama. “OSANA PEPESE TAMAITU UMA”

#### **A'OA'OGA:**

1. O Iesu o le tupu ma le fa'aola.
2. E alofa Iesu i tagata uma.



**MATAUPU:****UA TOETU IESU****SINI:**

Ia malamalama tamaiti na maliu Iesu ae na toetu.

**TUSI FAITAU:**

Mareko 16: 1 – 8 (mo Faiaoga)

Mareko 16:6 (mo le Vasega)

**“A ua fai atu o ia ia te’i latou, ‘Aua tou te matata’u; o lo’o outou saili ia Iesu le Nasareta o le na fa’asatauroina; ua tu o ia; e le o i’inei; ina matamata ia i le mea na latou tu’uina ai o ia”.**

**FESOASOANI MO FAIAOGA:**

Sa o tatou fa’amanatuina i le Aso Sa ua tuanai atu le afio mai o Iesu le Fa’aola, e fa’aola le lalolagi. Lea foi la na fa’amanatu e tatou i le Aso Faraile lea na te’ā nei, le maliu o Iesu. Manatua la na maliu Iesu i luga o le satauro, ona omai lea o tagata ua ave lona tino ma tu’u i totonu o le tu’ugamau.

Ae faimai la le tatou tala o le taeao lenei, na usu tina e to’atolu, o Maria le Makatala, ma Maria le tina o Iakopo, ma Salome, e o e asi le tu’ugamau o Iesu, Sa o tina nei ma ave mea manogi e asi ai le tu’ugamau. Ae ua tete’i lava tina ia i le taunu’u atu i le tu’ugamau, ua fuli ese e le tagata le ma’ā sa pupuni ai le tu’ugamau.

Na fefefe tina ia, ma tamomo’e atu loa ua ulu atu i le tu’ugamau, ae na fa’ate’ia i latou i le o atu, ua leai se Iesu i le tu’ugamau, ae ua na o le tagata ofu paepae la ei totonu. O le tagata lea, o le agelu a le Atua.

Ona fai atu loa lea o le agelu i tina, “Aua tou te matata’u, o lo’o outou saili ia Iesu le Nasareta, o le na fa’asatauroina; ua tu o ia; e le o i’inei o ia; ina matamata ia i le mea na latou tu’uina ai o ia”. Ioe, faimai le agelu, **“ua toetu Iesu”**.

Aua ana le toetu mai Iesu, semanu e leai se tala fafia mo tatou. Peitai o le toetu o la tatou uo o Iesu mai le oti ma le tu’ugamau, o le fa’aoletaga lava lea mo tatou uma lava.

**Upu Faamalamalama:**

- i) Matata’u - fefefe
- ii) Ua tu o ia - ua toe ola mai

**GALUEGA FAATINO:** Valivaliga ata.

Fa’amolemole susuga i faiaoga, e fai ni kopi o le ata ua tuuina atu i le tusi, ona tufa lea o ni vali i tamaiti e valivali ai a latou ata. Fesoasoani ane a outou sususga i nai tamaiti.

**PESE:**


Le taeao segisegi le vaveao e le’i malamalama  
 Le Talalelei mo oe, le Talalelei mo a’u  
 O Salome ma Maria ma Maria le Makatala  
 Le Talalelei mo oe, le Talalelei mo a’u  
 Ua fa’atauina mea manogi e asi ai le tu’ugamau,  
 Le Talalelei mo oe, le Talalelei mo a’u

Tali: Ua iloa le tu'ugamau ua avanoa  
Ua le o i ai toe o ie na la'ei ai  
Ua le o i'inei o Ia ae ua toe soifua mai,  
Le Talalelei mo oe, le Talalelei mo a'u.

**A'OA'OGA:**

1. O le tala fiafia, ua toe tu Iesu.
2. Ia viia lo tatou Alii toetu.





**ASO SA:**           **24 APERILA 2022**

**MATAUPU:**       **UA TOE FA'AOLA E IESU LASALO**

**SINI:**              Ia malamalama tamaiti o le malosi o le mana o Iesu, na toe ola ai Lasalo.

**TUSI FAITAU:**     Ioane 11: 38 – 44 (mo Faiaoga)  
                        Ioane 11: 43       (mo le Vasega)

*Ua ia fetalai atu ia upu, ona alaga lea o ia ua leo tele, “Lasalo e, ina sau ia i fafo”.*

#### **FESOASOANI MO FAIAOGA:**

Tatou te le’i va’ai lava ua tupu se mea fa’apea. Ose tagata ua oti, ae tautala atu i ai se isi tagata ona toe ola mai lea. Ae sa tupu i le taimi o Iesu. O teine e toalua, o Maria ma Maretia e i ai lo la tuagane e igoa ia Lasalo.

Na ma’i Lasalo, ona alu lea o le fe’au a teine ia i a Iesu, e alofa e sau se’i fa’amatolo si o la tuagane. Na tuai mai Iesu, ma ua i’u ina oti si tama o Lasalo. Ua atoa le fa o aso, ae fa’atoa maliu mai Iesu. Ona faiatu lea o le tala a le teine o Maretia, “Iesu, aua; ai ua manogi aua o lea ua atoa le fa o po talu ona tu’u o ia i le tu’ugamau”.

O lona uiga ua leva ona oti Lasalo. Ae faimai le tali a Iesu ia Maretia, “Ou te le’i fai atu ea ia te oe e te talitonu mai ia te a’u?” Ua fuli ese e tagata le ma’a sa tapuni ai le tu’ugamau, ona alaga lea o Iesu ua leotele lava, “Lasalo, ina sau ia i fafo”. Na ofo teine nei o Maria ma Maretia ma tagata uma sa i ai, ina ua va’ai atu ua sau i fafo Lasalo mai le tu’ugamau.

E le i faia e Iesu se galuega e fa’aoia ai Lasalo, ae na o lana upu lava na fai atu ai, ona toe ola mai ai lea o Lasalo. O lona uiga, o le upu a Iesu, e i ai le malosi, o le mana ma le pule, e toe fa’aoia ai tagata ua feoti. E o’o foi ia tatou, e mafai foi e Iesu ona fai ni vasega ia tatou, pe a tatou usitai ma fa’alogo i la tatou uo o Iesu.

#### **Upu Fa’amatalamalama:**

- i)      Fetalai                    -      fai atu, tautala atu.
- ii)     Alaga                    -      tautala leotele, vala’au leotele

#### **GALUEGA FA’ATINO:**

Taliga Fesili:

1.      O ai le igoa o le tama lea na oti?

Tali:   O Lasalo

2.      Na faafefea la ona toe ola Lasalo?

Tali:   Na fetalai i ai Iesu.

3.      O a upu na fai atu ai Iesu ia Lasalo?

Tali:   Lasalo e, ina sau ia i fafo.

**PESE:** (fati: the wheels on the bus go round and round).

1. O si tama o Lasalo ua le toe sau,  
Ua le toe sau, ua le toe sau.  
O si tama o Lasalo ua le toe sau  
Ua fa po i le tu'ugamau.
2. O Iesu lea ua afio mai  
Ua afio mai, ua afio mai.  
O Iesu lea ua afio mai,  
Ma fetalai loa i ai


Tauloto: “*Lasalo e, ina sau ia i fafo*”.

3. O Lasalo lea ua toe ola mai  
Ua toe ola mai, ua toe ola mai,  
O Lasalo lea ua toe ola mai,  
O Iesu na mafua ai.

**A'OA'OGA:**

1. Ua toe fa'aola e Iesu Lasalo
2. Iesu le uo alofa.

*UA TOE FA'AOLA E IESU LASALO.*



**Resurrection of a man  
(The 4 days in the grave)**

## **MANATU AOAO ME & IUNI: O TAGATA MA A LATOU AMIO**

O le manatu aoao o lenei foi lua masina, o lo'o faamamafa ai le taua o amio a nisi foi o tagata o lo'o ta'ua i le Tusi Paia, ina ia aumai ai ni a'oa'oga taua ma le aoga mo le tapu'eina o le ola tutupu a'e o le fanau.

**ASO SA                    1 ME 2022**

**MATAUPU:                UA LE USITAI ATAMU MA EVA I LE ATUA**

**SINI:**                    Ia malamalama tamaiti e le se mea lelei le ola le usitai.

**TUSI FAITAU:**           Kenese 3: 1 – 6 (mo Faiaoga)  
                                Kenese 3: 6        (mo le Vasega)

**“Ona va'ai atu lea o le fafine i le la'au e lelei lava pe a ‘ai, ma ua matagofie mai, o le la'au foi e aoga e maua ai le poto, ona tago ai lea o ia i lona fua, ma ‘ai ai, na ia avatu foi i lana tane fa'atasi ma ia, na ‘ai ai foi o ia”.**

### **FESOASOANI MO FAIAOGA:**

Tasi lenei o uiga po'o amio e le fafia i ai le Atua, o le ola le usitai. O tagata muamua lava ia na faia e le Atua, a'o tagata muamua foi ia na faia lea amio sese, o le lē usita'i i le Atua. Na uma loa ona faia e le Atua Atamu ma Eva, ona tu'u lea e le Atua i le fa'ato'aga i Etena, e nonofo ai ma tausi lelei le fa'ato'aga.

Na fa'atonu e le Atua Atamu ma Eva, ina ia la nonofo ma a'ai i la'au uma o le fa'ato'aga ma fa'aaoga, ae tasi lava le la'au aua ne'i la a'ai ai, aua foi nei tago i ai o la lima, o le la'au e iloa ai le lelei ma le leaga. Afai la te pa'i i lea la'au ma a'ai i ona fua, ona feoti loa lea o i la'ua.

Peita'i, e le i usita'i Atamu ma Eva i le fa'atonuga a le Atua. Ua sau le gata ma fa'aosooso Eva e tago e a'i le fua o le la'au, e la te le feoti lava. E tilotilo atu Eva i le la'au ma ona fua, e ese le manaia, ona tago loa lea o Eva ua tau mai le fua o le la'au, ua ai, ma avatu foi ia Atamu ona ai ai foi lea o Atamu. O le mea la na tupu tamaiti, ua le fafia le Atua, ma tutuli ese Atamu ma Eva mai le fa'ato'aga.

### **GALUEGA FAATINO: Tusiga ata.**

E lelei ona tufa ni pepa ma ni vali i tamaiti, ona fai lea i ai e tusi mai le ata o le la'au. Silasila pea lau susuga i le faiaoga i le galuega a tamaiti ma fesoasoani i ai.


**PESE:                    (Fati: Aue le namu e ese lou le alofa)**

1.        Aue le gata e ese lou le leaga  
            Lou fa'aosooso o le uluai tagata  
            Ua e fai i ai, e tago e ai  
            Le la'au ua uma ona fa'asa mai \*2

2. Fa'alogo ma usitai' i le Atua i le lagi  
E manuia ai lou olaga i le lumanai  
Ae aua ete fa'alogo i le tiapolo  
O ia lena na sau e fa'asese i o ta loto \*2

### A'OA'OGA:

1. E fiafia Iesu i le ola usitai.
2. Ua le usita'i Atamu ma Eva i le Atua.



**ASO SA:**           **8 ME 2022**

**MATAUPU:**       **UA ‘ATA’ATA SARA.**

**SINI:**              Ia malamalama tamaiti, na ‘ata’ata Sara ona o le lē talitonu.

**TUSI FAITAU:**     Kenese 18:1 - 15 (mo Faiaoga)  
                        Kenese 18: 12    (mo le Vasega)

**“Ona ‘ata’ata lemu lea o Sara, ua faapea, “Ua ou lo’omatua, e ia te a’u ea le fiafia? O la’u ali’i foi ua toea’ina ia”.**

#### **FESOASOANI MO FAIAOGA:**

O le toea’ina o Apera’amo ma lona to’alua o Sara, sa nonofo i lo la fare i le tasi aso, ae fa’afuase’i ona tutū mai ni tagata se to’atolu. Ona sauni lea e Apera’amo ma lona to’alua se mea’ai ma nei tagata. Ina ua uma ona a’ai o tagata nei, ona fai atu lea o le tasi o i latou ia Apera’amo, “O se taimi fa’apenei o le tausaga fou, o le a fanau ai e lou to’alua se tama tane”.

Ae manatua foi o le taimi lea ua ova ma le ta’i fitu sefulu tausaga o Apera’amo ma lona to’alua o Sara. Ae o lea ua faimai le tagata lea, o le a fanau e Sara se tama tane i le tausaga fou po’o le tausaga o lumana’i. O tagata nei e to’atolu, o agelu a le Atua. E fai la le tala a le agelu ia Apera’amo, ae o lo’o fa’alogologo mai Sara i tua o le pupuni. Ua ‘ata’ata Sara ma fa’apea ana upu, “Ua ou lo’omatua, ua toea’ina foi lo’u to’alua, e fa’apefea ona ou toe fanau?”. O lona uiga e le talitonu Sara i le upu ua fai atu ai agelu ia Apera’amo. O le mea lea na ala ai ona ‘ata’ata. Ae ua galo ia Sara, e leai se mea e faigata i le Atua.

**GALUEGA FA’ATINO:**   Valivaliga ata

\*Fa’amolemole faiaoga e fai ni kopi o le ata lea ona tufa lea i tamaiti e valivali. Ia saunia foi e susuga i faiaoga ni fesili faigofie e tulituliloa ai le mata’upu i tamaiti.

**PESE:**              (Fati: youtube: One little finger)


1.     Aperaamo, Aperaamo,  
      O lona toalua o Sara,  
      Na ia ataata i le lē talitonu  
      I tala a agelu ha!ha!
  
2.     O le talitonu ma fa’atuatua,  
      E fiafia mai ai le Atua  
      Po’o a lava ana folafolaga,  
      Na te fa’ataunu’u lava ha!ha!

#### **A’OA’OGA:**

1.     E leai se mea e faigata i le Atua.
2.     E fa’amaoni le Atua.



## Ua ‘ata’ata Sara.



**ASO SA:**           **22 ME 2022**

**MATAUPU:**       **O APERAMO LE TAMĀ LELEI**

**SINI:**              Ia malamalama tamaiti i le lelei o Aperamo na ia alofa ai ia Lota

**TUSI FAITAU:**     Kenese 13: 1 – 13 (mo Faiaoga)  
                        Kenese 13: 8        (mo le Vasega)

*Ona fai atu lea o Aperamo ia Lota, “Aua lava ne’i femisa’i i ta’ua, po’o a ta’ua leoleo manu; aua o le uso i ta’ua”.*

**FESOASOANI MO FAIAOGA:**

O le tu’ua e Aperamo ma lona aiga o Aikupito, ae toe fo’i i Kanana, o le mea na poloa’i ai le Atua ia te ia. Ua latou ī, o Aperamo ma Lota le atali’i o lona uso, fa’atasi ma a la leoleo manu ma latou lafu manu.

E tele le tamaoaiga a Aperamo, o lafu manu, ma ario ma auro, a’o Lota foi, sa tele foi ana lafu manu, ma faleie. Ua femisa’i auauna a Aperamo ma auauna a Lota, ona fai atu ai lea o Aperamo ia Lota, “aua nei femisa’i i ta’ua, po o a ta’ua leoleo manu; aua o le uso i ta’ua”. Ae manatua lelei, e le o se uso o Aperamo ia Lota, o le atali’i o lona uso.

Peitai, o le ata lena o le lelei o Aperamo, na ia alofa ai ia Lota le atali’i o lona uso. Ua le gata ina ta’u e Aperamo Lota o lona uso, ae ua ia tu’u muamua foi le avanoa ia Lota e filifili ai po o fea le fanua e fia nofo ai. Lea na filifili ai e Lota le fanua laugatasi ma le lelei mo ia.

**GALUEGA FAATINO:**

Taliga Fesili:

1.       O ai na malaga faatasi ma Aperamo?

Tali:     O Lota ma a la auauna

2.       E fa’afefea ona iloa o Aperamo o se tamā lelei?

Tali:     O le alofa ia Lota)

3.       O le a le tala a Aperamo na fai ia Lota?

Tali:     Aua nei misa ta’ua.


**PESE:** ( fati: sau sau ia ta fiafia)

1. Aperamo o se tama lelei ma le loto alofa  
Na ia ave ai o le fa’amuamua ia Lota  
Ma lana upu aua lava ne’i femisa’i i taua  
Ma a ta leoleo manu aua o le uso ta’ua.

2. A'o le finagalo foi lea o le Atua mo tatou uma  
Alofa i le Atua, alofa i le uso i taimi uma  
Ae aua le feaina'i e tupu ai o le maaasiasi  
O tagata fa'apena e le mana'omia lava i le lagi.

#### A'OA'OGA:

1. Aua le taua'imisa e le fiafia ai Iesu.
2. Ia alofa i le isi tagata.
3. O le Atua o le tamā lelei mo tagata uma.



**MATAUPU:****O SAMASONI LE TAMA MALOSI**

**SINI:** Ia malamalama tamiti o le malosi o Samasoni na aumai i le Atua, na fasia ai Filisitia.

**TUSI FAITAU:** Fa'amasino 16: 22 – 31 (mo le Faiaoga)

Fa'amasino 16: 30 (mo le Vasega)

*“Ua fai atu Samasoni, “Ia ou oti fa’atasi ma Filisitia”. Ona punou fa’amalosi lea, ua pa’ū le fale i luga o ali’i, ma luga o le nu’u uma sa i ai; sa to’atele e na fasiotia e ia i lona oti, i e na fasiotia e ia a’o ola ia*

**FESOASOANI MO FAIAOGA:**

O Samasoni, o lona tama o Manoa mai le ituaiga o Tanu. A’o lei fanau mai Smasoni, na poloai le Atua i ona matua e ala i lana agelu, ina ia aua ne’i inu le tama o le a fanau mai, ise uaina, aua foi ne’i o’o se tafi i lona lauulu.

Ina ua fanau mai Samasoni, sa fai e ona matua ia te ia e pei ona poloa’i mai o le Atua. Ua tupu le tama ma ua malosi. Sa fai o ia ma fa’ola ia Isaraelu, ai lima o Filisitia. Peita’i, na toilalo le tama ina ua alofa i le fafine o nu’u ese, ma i’u ina tafi ai e tagata o lea nu’u le lauulu o Samasoni, ma alu ese ai lona malosi, po’o le mana sa ia te ia na mafua ai ona malosi.

E ui ina ua alu ese le malosi sa ia Samasoni, ae na to’atele lava tagata na ia fasiotia i le taimi o lona malosi. E ui foi o lea ua fa’avaivaia o ia ona ua ia soli le upu a le Atua, ae sa tumau pea le talitonu o Samasoni i le Atua, o ia e toe maua ai lona malosi.

O le ala lea faimai a’o fai le fiafia a le nu’u o Filisitia, ua latou aumai ai Samasoni ua uma ona sali ese ona mata, ma latou amuamu ma ula ia te ia ma lona Atua. Peitai o le Atua o Samasoni, o le Atua e mata’utia, o le ala lea na ona tatalo atu lava o Samasoni i le Atua, toe fa’afroi mai loa e le Atua lona malosi.

Le malosi la lea o Samasoni na ia tago atu ai loa i pou e lua na mau ai le fale, ua tulei ma pa’ū ai loa le fale sa tumu ai tagata. Faimai le tala, e sili atu ona toatele tagata na fasioti e Samasoni i le aso lea, nai lo tagata na ia fasiotia muamua, a’o matuā malosi lava.

**GALUEGA FA’ATINO:**


Va’ai ni fasi laa’u mimiti e tufa le ta’itasi i tamaiti, ona fai lea i ai e fetagofi e gaui. O le uiga o le galuega fa’atino, ina ia iloa e tamaiti le uiga o le upu malosi. E le o le malosi foi lea e tago ai fua fasi le isi tamaitiiti, ae o le malosi e fa’aaoga tatau e fesoasoani ai i le tamā ma le tinā.

**PESE: Samasoni o le toa**

1. Samasoni o le toa o le fale, gausia pou o le fale,  
Gausia pou o le fale, gausia pou o le fale.

## A'OA'OGA:

1. O Samasoni le tama malosi.
2. E sili atu ona malosi le Atua



**ASO SA:** **5 IUNI 2022**

**MATAUPU:** **O IOANE LE PAPATISO**

**SINI:** Ia malamalama le fanau i le fa'amaoni o Ioane i le fa'atinoga o lana galuega.

**TUSI FAITAU:** Mataio 3: 11 – 17 (mo Faiaoga)  
Mataio 3: 13 (mo le Vasega)

**“Ona maliu atu ai lea o Iesu mai Kalilaia i Ioritana ia Ioane, ia papatisoina ai e ia”.**

#### **FESOASOANI MO FAIAOGA:**

Ua masani le fa'alogo a tamaiti i le tala lenei, peita'i, o lo'o tele pea a'oa'oga taua o lo'o afifi i totonu o lenei tala. E tusa ma le maolimau ale Tusi Paia, o Ioane, na fanau mai lava ua uma ona tofia o ia e le Atua i lona faiva fa'a-papatiso.

O le galuega a Ioane, ose galuega taua tele, aua o le papatisoga, o le fa'ailoga o le avea ai o tagata ma tagata o le aiga o le Atua. O le mea sa sili ona taua i le galuega a Ioane, o lona malamalama lelei i le ese'esega o lana papatisoga, ma le papatisoga a Iesu. Lea e pei ona ta'ua i le fuai'upu e 11, o lo'o faapea ai Ioane, “O a'u nei, oute papatiso atu ia te outou i le vai ina ia salamo; ae peitai o le mulimuli mai, o ia lea na te papatisoina atu ia te outou i le Agaga Paia ma le afi.

E to'atele lava la tagata na papatisoina e Ioane, a'o le i maliu atu Iesu ia Ioane ina ia papatisoina o ia. E le i mana'o Ioane na te papatisoina Iesu, ae na fai atu Iesu ia Ioane, “Ioane, e ao ona fa'ataunu'u o mea tonu uma” O le avanoa ua tu'uina atu e Iesu ia Ioane, e fa'atino ai pea lana galuega e pei ona vala'auina ai o ia e le Atua.

O le a'oa'oga foi lea mo le fanau, ina ia latou fa'amaoni i so'o se feau e fa'atonu ai latou e o latou matua. Aua le fefe, aua foi le lē fa'amaoni, ae ao ona faia mea uma ma le usita'i i matua, aua e taua uma lava mea e faia e tatou i le finagalo o le Atua.

#### **GALUEGA FAATINO:**

Manaia ae fa'atino e tou susuga i faiaoga ma tamaiti le tala. Amata i le fa'atinoga o le papatisoga o isi tagata, se'ia o'o i le taimi ua alu atu ai Iesu ia Ioane ina ia papatisoina. Saunia foi e lau sususga i le faiaoga ni nai fesili se lua e tuliloa ai le malamalama o tamaiti i le mata'upu.

**PESE:** (fati: you tube: dog name bingo song)

1. O ai le igoa o le papatiso na sau mai le vao,  
I-O-ANE, I-O-ANE, I-O-ANE  
O Ioane lona igoa

#### **A'OA'OGA:**

1. O Ioane le papatiso.
2. Fa'amaoni i feau.



**ASO SA:** **12 IUNI 2022**

**MATAUPU:** **O SAMUELU LE TAMA USITAI**

**SINI:** Ia malamalama tamaiti o le usitai o Samuelu ia Eli, o lona usitai lava lea i le Atua.

**TUSI FAITAU:** 1. Samuelu 3: 1 – 14 (mo Faiaoga)  
1. Samuelu 3: 10 (mo le Vasega)

*“Ua afio mai le Alii, ona tu lea ma vala’au, pei ona lua’i fai, ‘Samuelu! Samuelu e! Ona tali atu lea o Samuelu, ‘Fetalai mai ia, aua o lo’o fa’alogologo atu lau auauna’”.*

**FESOASOANI MO FAIAOGA:**

Fa’atalofa atu foi i le vasega amata i lenei taeao. O le tatou mata’upu o lenei aso, “O Samuelu le tama usita’i”. O Samuelu sa nofo i le fale o le ositaulaga o Eli. O le igoa o lona tina, o Hana. Faimai a’o moe Samuelu i le tasi po, ae fa’alogo atu, o vala’au le tagata i lona igoa, “Samuelu! Samuelu e!” Ona tali atu lea o Samuelu

Na nofo i luga le tama o Samuelu ma autilo solo, po’o ai lea e vala’au i lona igoa. Ua fiu le tama e autilo, na te leiloa atu lava se tagata. Ua tu i luga Samuelu, ma tamo’e loa i le mea o lo’o tofa ai Eli le ositaulaga. “Eli! Eli! O a’u lenei, aua na e vala’au atu ia te a’u” Ae na tali atu Eli e fa’apea, “Samuelu e leai, ou te le’i vala’au, foi ia ina ta’oto”

Ua toe foi Samuelu ua taoto e moe, ae toe fa’alogoina foi e Samuelu le tagata o vala’au i lona igoa, “Samuelu! Samuelu!” Ua toe nofo i luga Samuelu ma toe alu ia Eli. “Eli, o a’u lenei aua na e vala’au ia te au”. Ua toe fai atu foi Eli, “Samuelu, ou te le’i vala’au ia te oe, foi ia ina moe”.

Ua toe alu foi Samuelu ua ta’oto e moe, ae toe vala’au foi le tagata i lona igoa. Ua toe tu foi i luga le tama o Samuelu, ma alu atu ia Eli. “Eli o au lenei, aua na e vala’au ia te au”. Ua tali atu foi Eli, “Samuelu, ou te le’i vala’au ia te oe. Foi ia ina ta’oto, a toe vala’au o ia ia te oe, ona e tali lea i ai, ‘Featalai maia, o lo’o fa’alogologo atu lau auauna”.

Faimai na usitai le tama o Samuelu ia Eli, ma toe foi loa i lona moega, A’o taoto le tama o Samuelu, na ia toe fa’alogoina foi le vala’au, ona ia tali lea i ai e pei ona fai atu ai Eli ia te ia. “Fetalai maia le Ali’i e, o lo’o fa’alogologo atu lau auauna.


**GALUEGA FAATINO:** Fa’atinoga o le tala.

Manaia ae fa’atino e tou susuga i faiaoga fa’atasi ma tamaiti le tala e pei ona fa’amatalaina, ina ia saga malamalama atili ai tamaiti i le ola usita’i o le tama o Samuelu.

**PESE:** Pese: Fa’auta, fa’auta, ou te tu i le faitoto’ a ma ou tu’itu’i atu

**A’OA’OGA:**

1. E fiafia Iesu i le ola usiusita’i.
2. Ua usitai Samuelu ia Eli.



**ASO SA:** **19 IUNI 2022**

**MATAUPU:** **O IONATANA O SE UO LELEI**

**SINI:** Ia malamalama tamaiti, o le galuega alofa na faia e Ionatana ia Tavita, o le ata manino lena o ia o se uo lelei.

**TUSI FAITAU:** 1. Samuelu 18: 1 – 5 (mo le Faiaoga  
1. Samuelu 18: 4 (mo le Vasega)

*Ua to ese foi e Ionatana lona ofu talaloa nai ia te ia, ua foa'i atu ai ia Tavita, ma lona ofu tino, atoa ma lana pelu, ma lana aufana, atoa ma lona fusi.*

**FESOASOANI MO FAIAOGA:**

Fa'atalofa atu i lenei taeao o le Aso Pa'ia o le Ali'i. O le tatou mata'upu o lenei Aso Sa e fa'apea, "O Ionatana ose uo lelei". Ina ua uma le taua a Filisitia ma Isara'elu, lea na fasioti ai e Tavita le toa'tuta'ua o Filisitia, o Koliata, ona toe foi lea o Tavita i lona fale.

Ona sau lea o Apineru le tasi o auauna a Saulo, ua ave atu Tavita ma tu'uina atu ia Saulo. Ona fesili lea o Saulo ia Tavita, po'o ai sona tama. Na tali atu Tavita, o ia o le atali'i o Iese le Petele'ema. Ona ave lea e Saulo ia Tavita ma latou nonofo fa'atasi i le maota o le tupu, ae ua le toe foi Tavita i lona aiga.

Faimai o le aso lava lea na lagona ai e Ionatana le atali'i o Saulo, lona alofa ia Tavita, ma osi ai loa le la feagaiga o la'ua o le uo. Ua tago atu Ionatana, tatala ese lona ofu talaloa, ma lona ofu tino, o lana pelu, o lana aufana atoa ai ma lona fusi, ma foa'i uma atu ma Tavita, e fai ma pine o lona alofa ua moni ia Tavita. Ae o le ata manino lea o Ionatana, o ia ose uo lelei.

Galuega fa'atino: Tusiga ata.

E lelei ona tufa ni pepa ma ni peni vali i tamaiti, ona tago lea o le tamaitiiti ia e tusi le ata o lana uo. Fesoasoani i ai a tou susuga i faiaoga i le galuega a nai tamaiti.

**PESE:** (Iesu le uo a tamaiti.)

**A'OA'OGA:**

1. O Iesu le uo lelei a tamaiti.
2. O Ionatana ose uo lelei.



**ASO SA**

**26 IUNI 2022**

**MATAUPU**

**O LE AUAUNA FA'AMAONI**

**SINI:**

Ia malamalama le vasega,e tauia e le Atua le tagata fa'amaoni.

**TUSI FAITAU:**

Mataio 25:14 – 30 (mo Faiaoga)

Mataio 25: 21 (mo le Vasega)

*Ona fai atu ai lea o lona ali'i ia te ia, Ua lelei, le auauna lelei e, male fa'amaoni, ua e fa'amaoni i nai mea itiiti, ou te tofia oe e pule i mea e tele; ina ulufale maia i le fiafia o lou ali'i.*

#### **FESOASOANI MO FAIAOGA:**

Fa'atalofa atu ia te outou le fanau i lenei foi taeao fou. O le tatou mata'upu o lenei Aso Sa e fa'apea, "O le auauna fa'amaoni". O se tasi lenei o fa'ataoto po'o tala fa'a-fa'atusa a Iesu, na fa'amatala i lona auso'o, ma le motu o tagata sa i ai, e aofia ai ma ta'ita'i o le lotu Iutaia.

O le matai ma ana auauna e to'atolu. Ua sauni le matai e alu malaga, ona ia a'ami lea i ana auauna, ma avatu ia i latou galuega (taleni) latou te faia, ae se'i foi mai lana malaga ona maua lea o ō latou totogi.

O le auauna muamua ua ia avatu i ai taleni e lima, o le lona lua, na ia avatu i ai taleni e lua, ma le auauna lona tolu, na ia ave i ai le taleni e tasi. Ua alu atu le auauna sa i ai taleni e lima, ua galue ma fa'atau atu taleni e lima sa ia te ia, ma toe maua mai ai isi foi taleni e lima.

Ua fa'apena foi i le na i ai taleni e lua, ua ia alu ma fa'atau atu taleni sa ia te ia, ma toe maua ai le isi lua. A'o le auauna lea sa i ai le taleni e tasi, ua alu ia ma nana le taleni sa ia te ia. Leaga tele le mea ua faia e lea auauna.

Ina ua foi mai le matai, ona alu atu foi lea i ai o le auauna sa i ai taleni e lima, ua toe fa'afai i le matai ma fai atu, o taleni ia e lima na e tu'uina mai ia te au, ia lea na ou alu ma fa'atau atu, ona toe maua mai ai lea o isi taleni ia e lima. O lona uiga tamaiti, ua sefulu taleni ua maua e le matai, mai le auauna muamua.

Lea la na fai loa lea i ai o le tala lea a le matai, e pei ona tatou faitauina mai le Tusi Paia. "Ua lelei ia, le auauna lelei e, ma le fa'amaoni, ua e fa'amaoni i nai mea itiiti, ua ou tofia oe e pule i mea e tele; ina ulufale maia i le fiafia o lou ali'i".

Tamaiti, o fa'amanuiaga foi ia na maua e le auauna sa i ai taleni e lua. A'o le auauna lea sa i ai le taleni e tasi, ua fa'asala o ia e le matai, ma tuli ia te ia i fafo i le pogisa.

**GALUEGA FAATINO:** Valivaliga ata.

Fa'amolemole susuga i faiaoga, e fai ni kopi o ata o lo'o avatu i le tusi, ona tufa lea i tamaiti e valivali. Ia fesoasoani pea susuga i faiaoga i nai tamaiti. Saunia lava foi e lau susuga ni nai fesili se lua pe tolu e tulituliloa ai le mata'upu.

**PESE:**

(fati: youtube- oh Macdonald had a farm...)

1. E lima taleni sa tu'uina mai,  
Ia te au e le matai  
Sa ou alu atu ma fa'atau ai  
E sefulu ua maua ai  
Fa'atau atu ii, fa'atau atu i o  
Galue pea i le ao alu ai ma le po  
Le auauna lelei ma le fa'amaoni  
Ulufale mai ma le olioli.
  
2. E lua taleni sa tu'uina mai,  
Ia te au e le matai  
Sa ou alu atu ma fa'atau ai  
E fa lea ua maua ai  
Fa'atau atu ii, fa'atau atu i o  
Galue pea i le ao alu ai ma le po  
Le auauna lelei ma le fa'amaoni,  
Ulufale mai ma le olioli.
  
3. E tasi le taleni sa tu'uina mai,  
Ia te a'u e le matai  
Sa ou alu atu ma nana i ai  
E leai se mea na maua mai ai  
Le auauna leaga, le fa'amaoni  
Malie uso e leai o sou taui ,so sorry  
Alu atu loa i fafo i le pogisa  
O lou iuga lava lena.

**A'OA'OGA:**

1. Ia fa'amaoni i so'o se feau.
2. E tauia e le Atua le tagata fa'amaoni.





## **MANATU TA'IALA IULAI MA AOKUSO: MAFUTAGA I TOTONU O AIGA**

O se tasi lea o vaega o lo tatou soifua e taua pea ona fa'amamafa. O mafutaga i totonu o aiga. O se toe fa'amanatu ma le tauologologo pea i le fanau i lona taua. Ia lelei foi ona sapai ma aputiputi le ola o le fanau a o laiti ia matutua a'e, ua faigofie ona malamalama i le mafanafana o mafutaga i totonu o aiga.

**ASO SA:**           **3 IULAI 2022**

**MATAUPU:**       **O LE ALOFA O LE TAMĀ**

**SINI:**              Ia malamalama le vasega i le taua o le alofa fa'a-tamā

**TUSI FAITAU:**     Luka 15: 11 – 24 (Faiaoga).  
                        Luka 15: 20       (mo le Vasega)

*Ona tulai lea o ia, ua alu i lona tamā. Ua iloa atu foi e ia e lona tamā, ona mutimutivale lea o lona alofa ua momoe atu o ia, ua fusi ia te ia, ma sogi atu ia te ia.*

### **FESOASOANI MO FAIAOGA:**

Sa i ai le tasi tagata ma lana fanau tama e toalua. Ua o'o i le tasi aso ona mana'o lea o le tama la'itiiti ina ia aumai lana oa ma lana tamaoaiga. Ua alu le tama ua so'ona ulavale, ua tele le mimita ma fa'aaoga uma le tele o ana tamaoaiga. Ua uma ona ia fa'aaogaina lona tamaoaiga ona ia lagonaina lea o lona fia ai. Peitai, ua alu ma nofo i le tasi aiga e fafaga a latou puua. Ua ia lagona lona sese ma mafaufau i lona tamā ma lona aiga, ona tonu lea o lona manatu o le a foi i lona tamā. Ua iloa mamao mai e lona tamā, ona momoe lea ma fusi i lona atalii ma sogi ia te ia.

Tamaiti, e fa'apena le alofa o le tamā i lana fanau, po o le a lava lo tatou lē usitai ma amio leaga, ae e alofa pea o tatou tamā ia tatou. E le gata la na'o tamā ae fa'apena foi tinā. Ia manatua lelei e outou le fanau o le alofa o le tamā ma lou tinā, e le taitai ona uma mo tatou.

### **Uiga o Upu:**

- i)      tamaoaiga    -      tupe, tagata ua tele ana mea
- ii)     sogi          -      kisi
- iii)    mutimutivale -      alofa tumau

**GALUEGA FA'ATINO:**   Matamataga Ata

Fa'aali ata i le fanau ma fautuaina lau susuga i le faiaoga ina ia fai ni fesili i le fanau e tuliloa ai la tatou mataupu.


### **PESE: (tina tina lelei)**


1. Tama, tama alofa e le faafiti  
E ui ina faalogo gata le atalii  
Ae ua momoe atu ma sapai ia te ia  
Lagona I le loto o lona fiafia

2. E ui lava ina tatou le usitai  
Ae tumau pea le alofa I aso taitasi  
O le alofa lava lea o le Atua  
E faamagalo ma na le toe manatua

#### A'OA'OGA:

1. Faafetai i le Atua ona o tamā.
2. E alofa lo'u tamā ia te au.





© GOODFAIRY.COM

**ASO SA:** **10 IULAI 2022**

**MATAUPU:** **UA ALOFA ESAU IA IAKOPO**

**SINI:** Ia malamalama le vasega, o le alofa o Esau na faamagalo ai ia Iakopo

**TUSI FAITAU:** Kenese 33: 1 – 11 (mo faiaoga)

Kenese 33: 4 (mo le vasega)

*Ona momo 'e mai lea o Esau, e faafetai mai ia te ia, ua fusi ia te ia ma punou i lona ua, ma feasogi ma ia; ona la fetagisi ai lea*

### **FESOASOANI MO FAIAOGA**

O Esau ma Iakopo o le uso masaga, ua nonofo ‘ese’ese ma vava mamao, ina ua sola ese Iakopo talu le ita tele o Esau ma fia fasioti ia te ia. Ua mavae tausaga e tele, ua manao Iakopo e toe fia foi i lona aiga, e toe fia feiloai foi i lona uso matua o Esau. Ua tapena lona aiga, o ana ava ma lana fanau e malaga atu e feiloai ma Esau. Sa popole ma fefe Iakopo, aua sa manatu o ia, ai lava o tumau le ita o Esau, peitai e leai; na feiloai fiafia lava Esau ma Iakopo. Ua fusi atu e Esau lona uso o Iakopo ma feiloai ma le fiafia, ua feasogi ma fetagisi ona ua toe maua le la mafutaga ma lona uso.

O le lelei ma le manaia o le mea na faia e Esau, tiga lava ona leaga le mea na faia e lona uso ia te ia ae fa’amagalo lava i ai ona o lona alofa i lona uso. Tamaiti e finagalo le Atua ina ia tatou fa’amagalo ma alolofa i so’o se tagata. E le gata i o tatou aiga, ae fa’apea foi tagata o lo’o agaleaga mai ia i tatou.

**GALUEGA FA’ATINO:** Fa’atino le tala

Fa’amolemole lau susuga i le faiaoga ina ia fa’atino fa’atasi ma le fanau le tatou tala e pei ona fa’amatatalaina.

### **PESE: (fati: this is the day)**

1. O Iakopo, o Iakopo  
Na fa’amagalo, na fa’amagalo  
E Esau, e Esau  
O si ona uso, o si ona uso  
O se a’oa’oga taua lava lea  
E tatau ona fa’atino ina pea  
O le Atua, o le Atua  
O lona finagalo lea.

### **A’OA’OGA:**

1. Ia fa’amagalo i e ita mai
2. Alofa i lou uso



**ASO SA:** **17 IULAI 2022**

**MATAUPU:** **O LE TAMAITIITI POTO**

**SINI:** Ia malamalama le vasega, o le mata'u i le Atua o le amataga lea o le poto.

**TUSI FAITAU:** Faataoto 1: 5 – 7 (mo le Faiaoga)  
Faataoto 1: 7 (mo le Vasega)

*O le mata'u i le Alii o le amataga lea o le poto, ae inoino tagata valelea i le poto ma le a'oa'oina.*

**FESOASOANI MO FAIAOGA:**

Tamaiti, aisea tatou te o ai i le aoga? Ioe, ina ia maua le poto. O le poto, o se tasi lea o meaalofa foai fua mai e le Atua. O le tamaititi ua poto, e faigofie ona malamalama ma iloa faavasega mea e tele o le olaga. Faimai le tatou Tusi na faitauina “O le mata'u i le Atua o le amataga lea o le poto” o lona uiga, e tatau ona tatou usitai ma faaaloalo lelei i le Atua. Ia moeiina lelei ou mat ape afai le tatalo a tamā ma tinā. Ia aua foi le psa ma ulavavale pe ta'alo i i totonu o le falesa pe'a fai le lotu.

Ae o le tamaititi la e lē fiafia i le aoga, e le fiafia pe inoino foi i le poto. “ae inoino le tagata valea i le poto ma le a'oa'oina” lona uiga tamiti, o le tagata valea, e inoino i le poto ma e musu foi e alu i le aoga. E tatau la ona fiafia tatou e o i le aoga ma ia toaga mai i le lotu. O le tamaititi foi e valea, e inosia ma e leai se isi e fiafia pe alofa i ai.

Tamaiti, ia tatou toa'aga la i le aoga, ma ia fiafia foi e omai i le lotu. Ia nofo filemu ma ia faaaloalo pe'a fai le lotu. E le gata o totonu o le falesa, ae ia faapena foi pe'a fai le lotu i le fale. Ia piilima ma moeiina lelei ou mata ma aua le pisa.

**GALUEGA FAATINO:** Tauloto

Faamolemole lau susuga le faiaoga ia tusi le fuaiupu o le Tusi Paia o lo o faamamafa i se pepa ona a'oa'oina lea i le fanau.

**PESE: O le potoe taua**

1. O le poto e taua, I le olaga o le tagata  
Leai se mea e oi ai lou loto, pe a e mauaina o le poto.

**A'OA'OGA:**

1. E taua le poto
2. Ia ava i le Atua.

The fear of the Lord  
Is the begining  
Of knowledge:  
But fols despise  
Wisdom and instruction



Proverbs 1:7

**ASO SA:** **24 IULAI 2022**

**MATAUPU:** **O ISA'AKO LE TAMA USITAI**

**SINI:** Ia malamalama le vasega i le taua ma le aoga o le usitai.

**TUSI FAITAU:** Kenese 22: 1 – 19 (mo Faiaoga)  
Kenese 22: 9 (mo le Vasega)

*Ua o'o atu i la'ua i le mea na ta'uina mai e le Atua ia te ia; ona faia lea o Apera'amo o le fata faitaulaga i lea mea, ma fa'aafu le fafie, ua na fusifusi foi i lona atali'i o Isa'ako, ma fa'ae'e ia te ia i le fata i luga o le fafie.*

**FESOASOANI MO FAIAOGA:**

Tamaiti, o ai na te iloa, le igoa o le tama o Isa'ako lea e ta'u atu i le tatou tusi faitau? Lelei tele o Apera'amo. O Apera'amo na fetalai i ai le Atua ina ia ave lona atali'i e to'atasi o Isa'ako, e osi ai lana taulaga. Ua lagona lava fa'anoanoa o le toeaina o Apera'amo, ae na fai lava le mea pei ona fetalai mai ai le Atua. Ua sauni Apera'amo ma ua ia tapena le asini, o ana auauna e toalua fa'atasi ai ma lona atali'i ma latou õ loa.

Ua taunu'u Apera'amo ma lona atali'i i luga o le mauga, ona fusifusi ai lea e Apera'amo lona atali'i o Isa'ako, ma fa'ae'e ia te ia i luga o le fata. Ua iloa e Isa'ako, o ia lea o le a fai ai le taulaga a lona tama i le Atua. E le'i ita pe na fa'ali'i Isa'ako. Ae sa ia usita'i pea ma talia i lona loto le mea o le a fai ia te ia.

Peita'i, na vala'au mai le agelu a le Atua ia Apera'amo, ina ia aua ne'i o'o lona lima i le tama o Isa'ako. Na i'u i le manuia le olaga o Isa'ako aua sa alofa le Atua ma fa'amanuia ia te ia, ona o lona usitai.

**GALUEGA FA'ATINO:** Valivaliga ata

Lau susuga i le faiaoga, fa'amolemole ia fai ni kopi o le ata o loo saunia e tufa i tamaiti e valivali.

**PESE:** Fa'alogeo ma usitai

**A'OA'OGA:**

1. Ia faalogo ma usitai
2. E manuia le tamaitiiti usitai





**ASO SA:** **31 IULAI 2022**

**MATAUPU:** **O IESU O LE ATALI'I O LE ATUA.**

**SINI:** Ia malamalama tamaiti o le Atua lava na fetalai mai, o Iesu o lona Atali'i pele e toatasi.

**TUSI FAITAU:** (Mataio 3:16-17) mo faiaoga  
(Mataio 3:17) mo tamaiti

**FESOASOANI MO FAIAOGA:**

Fa'atalofa atu foi ia te outou le fanau i lenei foi taeao fou. Talitonu sa maua e i tatou se faiga malologa lelei i le po ua mavae. Ae o le tatou mata'upu fou la o le taeao lenei, e fa'apea, "O Iesu o le Atali'i o le Atua".

O ai foi matua o Iesu? Lelei tele, o Iosefa ma Maria. O lona uiga o Iosefa o le tama lea o Iesu, ae o Maria o le igoa lea o lona tina. Ae aisea la ua faimai ai o Iesu o le Atali'i o le Atua?

Ia fa'alogo lelei mai i le tatou tala. Sa alu Iesu ia Ioane, ina ia papatisoina o ia i le vaitafe o le Ioritana. E alu atu la Iesu, o tumutumu tagata i le vai, o le la e fai le papatisoga. Ona alu atu loa lea o Iesu ua agai atu i le vai.

E le'i manao Ioane na te papatisoina Iesu. Peitai, na fetalai atu Iesu ia Ioane, ina ia fa'ataunuu pea mea tonu uma. Ona papatisoina loa lea o Iesu e Ioane le papatiso. Ina ua uma ona papatisoina Iesu, ua tete'i tagata i le avanoa o le lagi, ae sau ai le leo, o lo'o fa'apea mai, "O lo'u atali'i pele lena, ua ou fiafia lava ia te ia".

Tamaiti, o le leo lea ua sau mai le lagi, o le leo po'o le siufofoga o le Atua. E le o le leo o Iosefa. Ae o le Atua lava ua ia ta'utino mai, o Iesu o lona Alo pele e to'atasi, e fiafia lava ia te Ia. O lona uiga o Iesu, na filifili e le Atua e fai mona Atali'i, na te fa'atinoina le finagalo o le Atua, e ala i le fa'aolataga o le lalolagi.

O tatou foi le fanau, e mafai foi ona fai i tatou ma atali'i ma afafine o le Atua, pe afai tatou te fa'alogo ma usita'i, ma faia mea uma ua faimai ai la tatou uo o Iesu. Ia ava ia tama ma tina, ma alofa i so'o se tagata.

**GALUEGA FA'ATINO:** Matamataga ata.

\*Ia fai ni kopi o ata o lo'o avatu i le tusi lesona, ona fa'aali lea o ata i tamaiti ma fesoasoani lau susuga i le faiaoga e fa'amatala ma fa'amalamalama ata i tamaiti. Ia tuliloa pea le malamalama o tamaiti i le mataupu.

**PESE: (fati: youtube; down by the bay)**

1. Ua afio mai, Iesu Keriso  
Sau ia Ioane o le papatiso  
E ui ina musu, Ioane e faataunu'u  
O mea tonu uma, e ao lava ona, fa'ataunu'u
  
2. O Iesu lea, ua papatisoina  
O le siufofoga, ua fa'alogoina  
O lo'u atalii, pele lava o Ia  
Ua ou fafia, fafia lava, ia te Ia.

**A'OA'OGA:**

1. O Iesu o le Atali'i o le Atua
2. E alofa le Atua i lona Atali'i





**ASO SA:** **07 AUKUSO 2022**

**MATAUPU:** **O LE TINĀ FAI MEA LELEI**

**SINI:** Ia malamalama le vasega i le taua o galuega lelei e faia e tinā

**TUSI FAITAU:** Mataio 26: 6 – 12 ( mo faiaoga)  
Mataio 26: 7 (vasega)

*Ona sau ai lea ia te Ia o le fafine ma le fagu alapasa ua iai le suau'u manogi tau tele, ona liligi ai lea e ia i lona Ao a o ta'oto o Ia e taumafa.*

#### **FESOASOANI MO FAIAOGA:**

O ai na inu sana ti ananei. Lelei tele, o le tasi lena o galuega e fai e tinā a tamaiti. E fai le tagamea ia mama ou lavalava, auli faamafolafola lou ofu, fai le kuka manogi ina ia manaia i le 'ai, ia ma le tele lava o isi feau ma galuega lelei e fai e tina i le fale.

O le tatou tala i lenei taeao, a'o ia i Iesu i le fale o Simona le lepela, o lo'o ta'oto Iesu e taumafa, ae sau le tasi fafine ma le suau'u manogi ma le taugata, ua ia liligi ifo i le ao o Iesu. Ua tupu le tiga i loto o le auso'o sa i ai, ma latou fa'apea ane "Se a le mea ua fa'amaumau ai lena mea? Aua ana fa'atau lena suau'u manogi pe ua tele sona tau e foa'iina atu i e matitiva". Ona tali ane ai lea o Iesu ma fa'apea "Se a le mea ua outou fa'alavelave ai i le fafine? Aua o le mea lelei ua na faia ia te a'u. Aua ua liligi e ia o lenei suau'u manogi i lou tino, e fai ma ta'imuaga i lo'u tanuga"

Tamaiti, o le tele o tagata latou te tu'u fesili i le tele o galuega lelei e faia e tina, ae ia o tatou iloa o lo'o i ai le fa'amoemoe lelei o lo'o taumafai ai tinā i so o sana mea e fai, e fa'apena foi i le fafine na faia le galuega lelei ia Iesu. O le tina lelei, e le aiu e faasoa atu le manuia i isi tagata.

#### **GALUEGA FA'ATINO:**

Matamataga ata: fa'amoelmole lau susuga i le faiaoga fa'aali ata o le tusi ma fa'amatalatala le taua o galuega 'ese'ese e faia e tinā.

#### **PESE:**

1. Tina, tina lelei e vave ona ala  
E fa'ata'ele a'u ma fai o'u lavalava  
Tapena mea'ai ne'i mole lo'u manava  
Momoli loa a'u o le aoga ua amata

#### **A'OA'OGA:**

1. E lelei lo'u tinā
2. Ia alofa i lou tinā





**ASO SA:** **14 AOKUSO 2022**

**MATAUPU:** **IA ILOA E MATUA LE MEA O LO’O E I AI.**

**SINI:** Ia malamalama le vasega e tatau ona faailoa i matua le mea o lo o i ai.

**TUSI FAITAU:** Luka 2: 41 – 48 (mo Faiaoga)  
Luka 2: 48 (mo le Vasega)

*Ua la ofo ina ua iloa atu o ia e i laua; ona fai ane lea o lona tinā ia te ia. “Lau tama e, se a le mea ua e fa’apea mai ai ia te i maua? Fa’auta o i maua ma lou tamā sa ma saili lava ia te oe ma le tigā.”*

### **FESOASOANI MO FAIAOGA:**

Ia amata lau mata’upu i le fesili. O ai e fiafia e tafao? E masani ona su’e la oe e ou matua? Ioe, e fa’apena le alofa o tatou matua. Latou te sa’ili ma fia iloa po o fea se mea o e tafao ai. E su’esu’e foi ina ia malamalama o lo o sefe ma saogalemu le mea o lo o e i ai. E lagona le popole ma le lē mautonu pe a o’o ane i le afiafi e te le o i ai i le fale.

A’o i ai Maria ma Iosefa i le ala ua toe fo’i mai Ierusalema i le tausamiga (‘aiga). Ua mavae le po e tasi ona la iloa lea’ e le o i ai Iesu i le malaga. Ua tupu le popole ma ua toe foi se’i sa’ili ia Iesu. Ina ua mavae aso e tolu, ona la maua lea o ia o lo’o nofo i totonu o le malumalu. Ona fesili atu lea o lona tina ia te Ia, “Se a le mea ua e fa’apea mai ai ia te i maua? Ua o ma saili ma le tigā ia te oe”. O lagona na o le tiga ma le popole e o’o i ai le tinā, pe’ a leiloa po’o fea o i ai lana tama.

Tamaiti, e tatau lava ona fa’ailoa i matua le mea o lo o e alu i ai, po o e tafao ai, ina ia aua nei popole pe tigaina foi i la’ua e toe tau su’e oe..

### **GALUEGA FA’ATINO:** Taliga Fesili

1. O fea sa i ai Iesu?  
Tali: totonu o le malumalu
2. Aisea na sue ai e Maria ma Iosefa Iesu  
Tali: Ona e le’i iloa e i la’ua le mea sa I ai o ia.
3. O le a la le mea e tatau ona tatou faia, pe a tatou o ise mea?  
Tali: tatau ona faailoa i matua.

**PESE:** (fati: ta’u i lou tina o Iesu e lelei o Ia)

1. Ta’u i lou tama, o le mea e te alu i ai  
Ta’u i lou tina o le mea lena e te tafao ai  
Aua ne’i su’ea oe e lou tama, aua ne’i su’ea oe e lou tina.  
Ta’u i ou matua o le mea lena e te i ai.

### **A’OA’OGA:**

1. Fa’ailoa i ou matua le mea e te alu i ai



Public Domain

**ASO SA:**           **21 AOKUSO 2022**

**MATAUPU:**       **E FIAFIA MATUA PE A POPOTO LE FANAU**

**SINI:**              Ia malamalama tamaiti e fiafia matua pe afai e popoto le fanau.

**TUSI FAITAU:**     Fa'ata'oto 10:1

*\*O le atali'i poto na te fa'afiafia lona tama; a'o le tama valea e fa'anoanoa ai lona tina.*

**FESOASOANI MO FAIAOGA:**

Talofa tamaiti, o a mai outou i lenei taeao fou? O le tatou mata'upu fou o lenei Aso Sa, e fa'apea; 'E fiafia matua pe a popoto le fanau". Tamaiti, e leai lava se matua e mana'o e ola valea pe ola fa'avalevalea sana tama.

O le mafua'aga lena e ala ai ona tatou omai i le aoga Aso Sa. O nisi foi o tatou, ia o lena ua a'o'oga i a'o'ga fa'ata'ita'i, ma a'o'ga tulaga lua. E fiafia foi o tatou matua e a'oa'o tatou i le faitauina o le A,E ma le I. O le mana'o o tatou matua, ia tatou popoto ma atamamai.

Aua a tatou popoto, o le a faigofie mea uma o le olaga. E pei foi o le tama o Solomona, lea na ia tusia le tusi lenei i Fa'ata'oto. O ia o le tama na fai i le Atua, e foa'i mai ia te ia le poto ma le loto matala. O Solomona na a'oa'oina lelei o ia e lona tama o Tavita.

Lea la e faimai Solomona, o le tama po o le teine poto, e fiafia ai le tama, ae o le tama po o le teine valea, e fa'anoanoa ai le tina. E mafua ona fiafia le tamā pe a poto le tama po o le teine, aua foi o le tamā e alu e sa'ili tupe e fa'aa'o'oga ai tatou. Ae mafua ona fa'anoanoa le tina pe a tatou valea, ona o le tina e tau'aveina uma le mamafa o le tausiga o tatou le fanau.

O le tina e ala po e auli ma tapena lelei ou lavalava aoga. Tapena lau mea'ai ma lau faguvai e ave i le aoga. O ia foi e alu e momoli oe i le aoga ma toe piki mai. E le gata i lea, o ia foi e saunia se meaai ma tatou, pe a tu'ua mai le aoga.

O lona uiga tamaiti, e le se galuega la'itiiti le galuega e feagai ma nai o tatou tina. Ma o le ala foi la lea, e fa'anoanoa ai lava lona loto, pe afai tatou te le maua le poto. Aua foi o lea ua le tauia lona tigaina i le taumafaiga o a tatou aoga.Tamaiti, e taua tele la lo tatou to'a'aga i le aoga, ina ia tatou maua le poto, ma fa'atupu ai le fiafia i loto o nai o tatou matua.


**GALUEGA FAATINO:** Taliga fesili.

1. Aisea e ave ai oe e lou tama ma lou tina i le aoga? \* Ia maua le poto
2. Aisea e fa'anoanoa ai le tina pe a valea le fanau? \*Ona o ia la e tigaina i le faiga o feau.
3. O le a la le mea e fiafia ai o tatou matua? \*Pe a popoto le fanau

**PESE:**           **(237 Pese ma viiga)**

## A'OA'OGA:

1. O le fanau popoto e fafia ai matua
2. Ia tatou to'a'aga i le aoga ina ia maua le poto.



### Proverbs 10:1

"The proverbs of Solomon. A wise son maketh a glad father:  
but a foolish son is the heaviness of his mother."

**ASO SA:** **28 AOKUSO 2022**

**MATA'UPU:** **LE ATUA ALOFA I TAGATA.**

**SINI:** Ia malamalama le fanau, o le alofa atoatoa o le Atua I le tagata, na maliu ai Iesu lona Alo.

**TUSI FAITAU:** Ioane 3:16

*“Aua ua fa’apea lava ona alofa mai o le Atua i le lalolagi; ua ia aumai ai lona Atali’i pele e to’atasi, ina ia le fano se tasi e fa’atuatua ia te Ia, ae ia maua e ia le ola e fa’avavau”.*

**FESOASOANI MO FAIAOGA:**

Fa’atalofa atu i le tatou vasega i lenei taeao fou. Talitonu o lo’o manuia uma lava tatou. Ae o le tatou mata’upu o le Aso Sa lenei, “O le Atua alofa i tagata”. Tamaiti na mafua ona tatou toe aulia mai le taeao lenei, ona o le alofa o le Atua ia i tatou.

Sa tatou momoe anapo, ae sa leoleoina i tatou e le Atua. Ua mafai foi ona maua e i tatou le malosi ma le ola, ona o le alofa o le Atua. O lona uiga, e alofa pea le Atua ia i tatou i aso uma lava o lo tatou ola. Ae aua nei galo, o aso uma lava e alofa mai pea le Atua, ae tatou te faia pea amio e le finagalo i ai le Atua.


O aso uma o lo tatou ola, tatou te faia ai pea le agasala. E amata mai lava i o tatou matua, se’ia o’o mai lava ia i tatou. Ae o le ala lena na maliu ai la tatou uo o Iesu, ina ia fa’amagalo ai a tatou agasala. Aua la, ana leai le maliu ma le toetu o Iesu, tatou te leiloa le alofa atoatoa o le Atua i tagata.

Lea la e pei ona faimai le tala a Ioane, “Ua fa’apea lava ona alofa mai o le Atua i le lalolagi, ua ia aumai ai lona Atali’i pele e to’atasi, ina ia le fano se tasi e fa’atuatua ia te ia, a ia maua e ia le ola e fa’avavau”. Tamaiti o le alofa o le Atua, e manuia ai tagata uma lava, o e talitonu ma alolofa ia te ia.

**GALUEGA FA’ATINO:**

Fa’amolemole faiaoga e a’o i tamaiti le fuai’upu o le tusi faitau.

**PESE:** (Le alofa o le Atua, pei o se li’o tele)



 CanStock

For God so loved the world  
that he gave his only Son,  
so that whoever believes  
in him will not perish,  
but have eternal life.

John 3:16

© CanStockPhoto.com - csp57188659

## **MANATU TAIALA SETEMA & OKETOPA: O VAVEGA NA FAIA E IESU**

O vavega o se tasi lea o galuega fa'aola ma lavea'i a Iesu a o i ai i ona taimi i le lalolagi. O se galuega na tele ina inosia ma faifai tala i ai le toatele o tagata, ae o lona taua ma ona aoga, na toatele lava nisi o tagata na talitonu ma malolo ma manuia ai foi.

**ASO SA:**           **4 SETEMA 2022**

**MATAUPU:**       **UA FAFAGAINA E IESU TAGATA TOATELE**

**SINI:**              Ia malamalama le vasega i le vavega na fai e fafaga ai tagata toatele.

**TUSI FAITAU:**     Mataio 14: 13 – 21 (mo Faiaoga)  
                          Mataio 14: 19        (mo le Vasega)

*Ona fetalai atu lea o ia i le motu o tagata, ia latou ta'o'oto i le mutia. Ona tago lea o ia i areto e limagafua ma i'a e lua lau, ua tepa a'e i le lagi, ua fa'afetai; ua ia tofotofi foi i areto, ua avatu i le auso'o, ona avatu ai leauso'o i le motu o tagata.*

### **FESOASOANI MO FAIAOGA:**

A'o i ai Iesu i le mea tu'ufua i luga o le va'a. Ua maliu atu o Ia i le isi itu o le vai, ae o lo'o tau mulimuli mai pea le motu o tagata ia te Ia. Ona ia fetalai atu lea i lona auso'o, ina ia fafaga i le motu o tagata, ae tali a'e le auso'o, e le lava mea'ai, ua na o areto e limagafua ma ia e lua lau. Ua latou ave ifo ia Iesu, ona ia fetalai lea i le motu o tagata ina ia ta'o'oto i le mutia, ae ua Ia tago a'e i le areto ma ia, ua tepa a'e i le lagi, ua fa'afetai ma tofotofi ma avatu i ona so'o, ina ia tufatufa i le motu o tagata.

O se vavega ofoo fogia na faia e Iesu. Ua ia fa'ateleina ai areto ma ia, ina ia fafaga ai le toatele o tagata. Tou te iloa la tamaiti, faimai le Tusi Paia, pe lima afe o tane po'o tamaloloa, ae le'i faitauina ai fafine ma tamaiti, ia ae na totoe foi mea'ai, ma na fu'e i latou ato ma tutumu ai ato e sefulu lua ma sa latou ave i o latou aiga.

Tamaiti, o le mata'utia ma le ofoo fogia lea o vavega na faia e Iesu, na ia fa'ateleina ai i'a ma areto, ina ia fafaga ai le motu o tagata e toatele.

**GALUEGA FAATINO:**    Valivaliga Ata

Fa'amolemole lau susuga i le faiaoga ina ia fai ni kopi o ata ua saunia, ma tufa i tamaiti e valivali.

**PESE:**              Lo'u Atua e, ua ou fia ai.

### **A'OA'OGA:**

1.     Ua fafaga e Iesu tagata e toatele.
2.     Aua le aiu.





MATTHEW 14

# JESUS FEEDS 5000

**ASO SA:** **11 SETEMA 2022**

**MATAUPU:** **UA SAVALI IESU I LUGA O LE VAI**

**SINI:** Ia malamalama le vasega e mafai e Iesu ona savali i luga o le vai.

**TUSI FAITAU:** Mataio 14: 22 – 27 (mo faiaoga)

Mataio 14: 25

*Ua maliu atu Iesu ia te i latou i le leoleoga e fa i le po, ua savali i luga o le vai.*

#### **FESOASOANI MO FAIAOGA:**

O ai se tasi e mafai ona savali i luga le vai? Ioe, e leai ma se isi, a'o le tatou tala i lenei taeao, e fa'amatalaina ai le savali ai o Iesu i luga o le vai.

Ina ua mae'a ona fafaga e Iesu o le motu o tagata e to'atele, ona ia auina lea o ona so'o i le va'a, ina ia muamua i le isi itu o le vai, a'o Iesu ua maliu i luga o le mauga e tatalo. Ina ua o'o i le afiafi, ua agi malosi mai luma le matagi, ua sou le vasa ma ua felafoa'iina ai le va'a o le auso'o. Ona maliu ae lea o Iesu ia te i latou i le leoleoga e fa i le po, ma ua savali i luga o le vai. Ua iloa mai o ia e le auso'o, ona latou tau fai ofo lea ma matata'u, ona o le mata'utia ma le ofoo fogia o mea ua latou va'ai i ai. Ae ua fetalai atu Iesu ia te i latou, "Ia outou loto tetele; o a'u lava, aua tou te matata'u"

Tamaiti, o le mata'utia lea o vavega na faia e Iesu, na Ia savali ai i luga o le vai, ae e le mafai e se tasi tagata ona faia. Ia tatou loto tetele ma ia tatou iloa, e mafaia e Iesu ona faia so'o se mea.

**GALUEGA FA'ATINO:** Valivaliga ata

Fa'amolemole ia fai ni kopi o ata ua saunia ma tufa ni peni vali i tamaiti e valivali ai latou ata.

**PESE:** Le Atua e tele

E malosi ma matautia

E leai se mea


E le mafai ona Ia faia

#### **A'OA'OGA:**

1. E mafai e Iesu ona faia soo se mea
2. Ua savali Iesu i luga o le vai
3. Ia tatou talitonu ia Iesu

## Jesus Walks on Water

Matthew 14:22-33



Jesus did many amazing things. In fact, he did more than anyone else ever did. And today we're going to see one more.



**ASO SA:** **18 SETEMA 2022**

**MATAUPU:** **UA PUPULA MATA O TAUASO**

**SINI:** Ia malamalama le vasega na faapupula e Iesu mata o tauaso

**TUSI FAITAU:** Mataio 20: 29 – 34 (mo faiaoga)

Mataio 20: 34 (vasega)

*Ona mutimuti vale ai lea o le alofa o Iesu, ua pa'i atu i o la mata; ona vaai loa lea o la mata, ona la mulimuli mai lea ia te ia.*

#### **FESOASOANI MO FAIAOGA:**

A'o malaga atu Iesu i Ieriko ma ua mulimuli mai ai le motu o tagata. I le auala lea, o lo'o nofonofo ai tagata tauaso e to'alua. O le tagata tauaso, o le tagata lea ua leiloa se mea pe ua pogisa atoa lana va'ai. Ua o la fa'alogo ua maliu atu Iesu ona la alalaga lea ma fa'apea atu "Le Ali'i e, le alo o Tavita ia e alofa mai ia te i maua," ae ua vavao (taofi) la'ua e le motu o tagata ae ia fa'alogo. Peita'i e lei mafai ona taofia ai le tau vala'au o tauaso nei e to'alua. Na toe alalaga ma taumafai ina ia lagona mai e Iesu le vala'au atu i le mea o lo'o la manana'o ai.

Ua tu Iesu ma fesili ia te i laua po o le'a le mea la te manana'o ai, ona la tali atu lea ia te Ia "Le Ali'i e, ia pupula o ma'ua mata" ona mutimutivale ai lea o le alofa o Iesu, ua ia pa'i atu i o la mata ona pupula ai lea o i la'ua, ua tula'i foi ma mulimuli ia Iesu.

Ia tamaiti, so o se mea lava tatou te manana'o i ai, ia vala'au i le Atua e ala i le tatalo. Ia aua ne'i e vaivai pe fiu gofie pe augata foi e tatalo i le Atua i mea e te mana'o ai, ona e tali mai lava Ia ia i tatou.

#### **GALUEGA FA'ATINO:**

Fa'atino le tala: lau susuga i le faiaoga ia fa'atino e lau susuga ma le fanau le tatou tala ua fa'amatalaina.


**PESE:** fati (My God loves me)

1. Le Atua ua tali mai  
I mea uma ou te manao ai  
O lou alofa x2  
Ua tele mo au  
Ia tumau e o'o i le fa'avavau

#### **A'OA'OGA:**

1. Ta'u i le Atua lou manao
2. Ua fa'apupula e Iesu mata o tauaso

Jesus had compassion on them and  
touched their eyes.



Matthew 20:34

**ASO SA:** **25 SETEMA 2022**

**MATAUPU:** **UA FA'AMALOLO E IESU LE TAGATA UA GASE LONA LIMA**

**SINI:** Ia malamalama le vasega e malolo le tagta i le fetalaiga a Iesu.

**TUSI FAITAU:** Mareko 3: 1 – 6 (mo faiaoga)

Mareko 3: 5e (mo le vasega)

*“..ona fetalai atu lea o Ia i le tagata “Ina fa’aloaloa ia lou lima” ona fa’aloaloa ai lea e ia, ona toe lelei ai lea o lona lima”*

#### **FESOASOANI MO FAIAOGA:**

Ina ua ulu atu Iesu i le sunako a’o i ai le tagata ua gase lona lima. I le taimi lea o lo’o lamalama pe mata’ituina Iesu ma lana galuega lavea’i. O lo’o maitauina lava e le au faresaio Iesu pe na te faia se galuega i le Sapati, ae se’i molia o Ia, ona o lo’o i ai le tulafono e fa’asaina ai le faia o se galuega po’o se fa’amatologa i le Sapati. Ua tiga le finagalo o Iesu, ona ua ia silafia lelei loto ma mafaufauga o tagata ua matuā ma’a’a, ona ia fetalai atu lea ia te i latou. “Pe sa ea le agalelei i le Sapati po’o le agaleaga; o le fa’aoa po’o le fasioti?” Ua ia silafia o le mea ua tatau ona fai, ina ia maua le mapu ma fa’amatolo i le tagata ua ma’i (gase) lona lima ma fetalai atu ai “Inā faaloaloa ia lou lima”

Tamaiti, na ona fetalai atu lava o Iesu e fa’aloaloa (tu’u i luga) lona lima, ona lelei loa lea. Ia tatou iloa, tusa lava pe le’i pa’i i ai Iesu ae na ia fetalai loa ma na alu atu ma le mana lana upu, ona malolo ai lea o le ma’i.

**GALUEGA FA’ATINO:** Valivaliga Ata

Fa’amolemole lau susuga i le faiaoga, ia fai ni kopi o ata ma tufa i tamaiti e valivali.

**PESE: (fati: daddy finger)**

1. O Iesu. o Iesu, Keriso  
Lima gase, lima gase ua malolo  
Fa’afetai, fa’afetai lou alofa  
Ua ou maua, ua ou maua ai o le ola.

#### **A’OA’OGA**

1. Alofa i tagata uma
2. E malosi fetalaiga a Iesu





**ASO SA:**           **23 OKETOPA 2022**

**MATAUPU:**       **UA FA'AMALOLO E IESU LE TALIGA O LE FITAFITA**

**SINI:**              Ia malamalama le vasega e mafaia e Iesu mea uma e finagalo ai.

**TUSI FAITAU:**     Luka 22: 47 – 53 (mo Faiaoga)  
                        Luka 22: 51       (mo le Vasega)

*Ona fetalai atu lea o Iesu, ua fa'apea atu "Soia ua lava lea." Ona tago ai lea o ia i lona taliga, ua fa'amalolo ia te ia.*

#### **FESOASOANI MO FAIAOGA:**

Talofa tamaiti, Ua fai si umi o le tatou malologa sa tatou i ai mo le lotu tamaiti. Ia fa'amanatu se mataupu o le masina ua te'a atu (Setema)

O le taeao lenei ta'u le ulutala: Ua fa'amalolo e Iesu le taliga o le fitafita." Ia e tofu uma lava tatou ma taliga, e tailua. E tāua tele, o tatou taliga. O le a foi le aoga o taliga? Ioe, e fa'alogo ai, ia manino ma iloa lelei ai mea o lo'o tutupu ma mea foi o le a tutupu.

O le tatou tala, o se mea na tupu a'o agai atu Iesu i lona fa'asatauroina. Sa tumutumu ai fitafita ma le tasi so'o o Iesu o Iuta. Na iloa lelei e Iesu, o Iuta o lona so'o lea o le a ia fa'aseseina o Ia (faalata) Sa tu latalata ane lava i tala ane o Iesu. Ona fa'apea atu lea o Iesu; "Iuta e, e te fa'alataina ea le Atali'i o le tagata ma le sogi? Ua lē fiafia nisi fitafita, ua latou fai ane ia Iesu, pe latou te taia ea i le pelu.

E lei manao ai Iesu. A o le tasi ua ia ta le isi fitafita ma tipieseai ai lona taliga taumatau. Ua taofi atu e Iesu, ma fa'apea atu ua lava. Ona tago ai lea o Ia ua toe fa'apipi'i lelei le taliga o le fitafita, ua toe atoatoa ai lana fa'alogo e pei o le isi taliga.

Ia tamaiti, e mafaia e Iesu mea uma e finagalo ai.


#### **GALUEGA FA'ATINO: TUSIGA ATA**

Tufa peni ma pepa, e tusi mai ai le ata o le taliga.

**PESE:** Ulu, tauau, tulivae, tamai vae  
Tulivae tamai vae x 2  
Ulu tauau tulivae ma tamai vae  
Mata taliga, isu ma le gutu

#### **A'OA'OGA FOU:**

1. E mafaia mea uma e Iesu.
2. E iloa e le Atua mea uma.



GoodSalt.com   Used with permission.

**ASO SA:**           **30 OKETOPA 2022**

**MATAUPU:**       **O IESU MA LE TAMA NA OTI**

**SINI:**              Ia malamalama le vasega na o Iesu e toe ola ai le tagata na oti.

**TUSI FAITAU:**     Luka 7: 11 – 17 (mo Faiaoga)  
                        Luka 7: 14       (mo le Vasega)

*Ua maliu ane o Ia, ua pai atu i le fata, ona tutu mai ai lea o le ‘au fata, ona fetalai atu lea o ia, “Le taule’ale’ā e, ou te fai atu ia te oe, ina tulai ia.”*

#### **FESOASOANI MO FAIAOGA:**

O le tatou mata’upu o lenei taeao: “O Iesu ma le tama ua oti.” Tamaiti tatou te lei va’ai lava i lo tatou nu’u, ua toe ola mai se tagata ua oti. E oti loa le tagata fai le lotu, teu/tanu loa i le fanua oti ia ona ta’oto ai loa lea.

Ua aga’i atu Iesu ma ona so’o, ma nisi tagata i le nu’u o Naina. A o ulufale atu i le a’ai, ae fata mai loa le tama ua oti. O le tama e toatasī a si fafine ua oti lona toalua. O lo o tagi lava si fafine. E toatele foi tagata o le nu’u sa fesoasoani i nei tagata e fata ane si ana tama iā Iesu.

Ua iloa atu e Iesu le fafine mafatia o lo’o tagi lava, ona alofa tele lea o Iesu ia te ia. Ua ia fa’apea atu; “Aua e te tagi” ona pai atu lea i le fata, ona tutu ai lea o le ‘au fata, ua ia fa’apea atu, “Le taule’ale’ā e, ou te fai atu ia te oe, ina tulai ia.” Ona nofo lea i luga o le tama na oti, ua tautala ona tu’uina atu lea e Iesu o ia i lona tinā. Uā fiafia le tinā, ua ofo le motu o tagata sa i ai ma latou vivi’i atu i le Atua.

Ia tamaiti, e na o Iesu lava e mafai ona toe ola ai le tagata oti.

#### **GALUEGA FA’ATINO: MATAMATAGA ATA:**


- Saunia ni ata e fa’amanino atili ai la tatou mata’upu
- Taumafai ia tele ni kopi e ave ma tamaiti o le ata o lo’o avatu i le mata’upu.

#### **PESE: (fati: Five little ducks went out one day).**

1. Iesu ua aga’i atu i Naina  
Fa’aaauai ai lana tala’iga  
O tagata ua latou fataina mai  
O le tagata oti se’i pa’i atu i ai
2. Iesu ua silasila ma le alofa  
I le tama ua uma o lona ola  
Iesu ua fetalai ia te ia  
Le taule’ale’ā ina tulai ia.

#### **A’OA’OGA FOU:**

1. Ua toe ola le tama na oti.
2. E alofa Iesu i tagata uma.



***He came near and touched the coffin, and  
the bearers stood still. He said, "Young  
man, I tell you, arise."***

**Luke 7:14**



## **MANATU TAIALA O NOVEMA MA TESEMA: O LE ATUA ALOFA**

Ua filifilia le manatu ta'iala mo masina e pei ona ta'ua i luga, ina ia malamalama tamaiti i nisi o tala e fa'aalia ai pea le alofa o le Atua.

ASO SA 6 NOVEMA 2022

## MATAUPU: UA VAE LUAINA LE SAMI

**SINI:** Ia malamalama le vasega e leai se mea e faigata i le Atua.

**TUSI FAITAU:** Esoto 14: 15 – 22 (mo Faiaoga)  
Esoto 14: 22 (mo le Vasega)

*Ona ui atu lea o le fanauga a Isaraelu i totonu o le sami i le iliti tai matūtū, ua fai foi le sami ma aupia te i latou i lo latou itu tauamatau, ma lo latou itu tauagavale.*

## FESQASQOANI MO FAIAOGA:

Tamaiti, o le tatou tala e fa'apea; Ua savavali Isaraelu i le sami matutu. Ua fa'aavanoaina le sami ae savavali ai Isaraelu. A o alu le faigamalaga a Isaraelu, e tele lava ni faigata sa latou o'o i ai.

Ua o'o latou i le sami, e le mafai ona latou savavali atu i le isi itu. Peita'i, sa fa'atonaunia e le Atua lo latou ta'ita'i malaga o Mose, i le mea e fai. Sa si'i i luga lona to'oto'o ma fa'aloaloa lona lima i luga o le sami. Ua vaeluaina le sami ua matūtū le iliti tai (vaega i lalo o le sami). Ona savavali ai lea o Isaraelu i le isi itu ma taunu'u manuia i latou.

Tamaiti, e leai se mea e faigata i le Atua. E saunia ma tapenaina e le Atua mea lelei uma mo tatou tamaiti

## GALUEGA FA'ATINO:

1. Tauloto: Mose, Mose faaloaloa lou to'oto'o  
Isaraelu, ua vaai ma le ofo  
Ua avanoa le iliti tai  
Tamomo'e aua le faavaivai
  2. Matamataga Ata: Saunia ni kopi o le ata o lo o avatu i le mataupu e tufa i tamaiti e matamata ai

## A'OA'OGA FOU:

1. E alofa le Atua ia Israelu.
  2. E leai se mea e faigata i le Atua.





**ASO SA:**           **13 NOVEMA 2022**

**MATAUPU:**       **UA FAFAGA E LE AGELU ELIA**

**SINI:**              Ia malamalama le vasega e faatasi ma laveai e le Atua ana auauna.

**TUSI FAITAU:**     1 Tupu 19: 1 – 8 (mo le Faiaoga)

1 Tupu 19: 6        (mo le Vasega)

*Ona va’ai atu lea o ia, fa’auta, sa i ona ulu le potoi areto ua tunu i ma’ a ‘a’asa, ma le ipu vai. Ona ‘ai lea o ia ma inu, ona toe ta’oto lea o ia.*

#### **FESOASOANI MO FAIAOGA:**

O le tatou matuapu i lenei taeao. Ua fafaga e le agelu Elia.

O Elia o le perofea po’o le faifeau. Tamaiti o ai foi lea na ave olaina i le lagi? Ioe, o Elia ma Enoka. Ia o Elia la o se tagata amiontonu. Sa galue lava o ia, ia iloa ma tapua’i tagata uma i le Atua. Peitai sa tele lava ina tapua’i tagata i atua ese. Na o’o lava ina faigata ona talia e tagata le tala’iga a Elia. Ua o’o ai loa ina fasioti e Elia tagata nei.

Sa o’o ina lē fiafia tagata ma le toalua o le tupu, le fafine o Iesepela. Ua latou taumafai ai e fa’ao’o le oti ia Elia. Ua iloa e Elia lea manatu, ona sola ai lea o ia. Ua alu i le vao ua mapu o ia i lalo o le la’au, o le ratami. Ua lagona lona lē lavā ma le vaivai.

Sa ia tatalo i le Atua, ina ia ‘ave ‘ese lona ola, ua ia fia oti. Peitai sa o’o ane le agelu, ua fafagu ia te ia. Ua ia avane le areto ma le ipu vai. Ua ia ‘ai ma inu ona toe ta’oto ai lea. Ua toe alu ane le agelu ma fai atu ia te ia, e tu i luga e ‘ai ma inu ona e mamao le ala. Ua fa’apea ona fai e Elia, ua maua lona malosi ona fa’aaauai lea o lana malaga.

#### **GALUEGA FA’ATINO:** Matamataga Ata

1.     Fai ni kopi o le ata ua avatu i le mataupu.  
E mafai ona fa’aaoga e lau susuga mo le fa’amatalaina o lau mataupu.  
Tufa mo tamaiti nisi kopi e saga iloa atili ai le lesona.

**PESE:**              Lo’u Atua e, ua ou fia ai ia e fafaga ia te au.  
Ia e fafaga ia te au  
Fafaga ia te au i aso uma o lo’u ola  
Fafaga ia te au  
Le mania mai luga  
Fafaga ia te au  
I lau afioga  
Fafaga ia te au i aso uma o lo’u ola.

} x 2

Oh Lord, I am hungry  
And I want to be fed  
Feed me all the days, of my life  
Feed me Jesus      }  
Feed me Lord      } x 2  
Feed me all the days of my life

**A'OA'OGA:**

1. E alofa le Atua i lana auauna o Elia.
2. E tausia i tatou e le Atua.





**a** alamy stock photo

RA8293  
[www.alamy.com](http://www.alamy.com)

**ASO SA:** **20 NOVEMA 2022**

**MATAUPU:** **UA ALOFA LE ATUA IA LOTA MA LONA AIGA**

**SINI:** Ia malamalama le vasega na faasaoina e le Atua Lota ma lona aiga.

**TUSI FAITAU:** Kenese 19: 1 – 19 (mo le Faiaoga)  
Kenese 19: 16 (mo le Vasega)

*Ua fa'atuatuai o ia, ona fetagofī lea o ia tagata i lona lima, ma le lima o lana avā, ma lima o ona afafine e to'alua, ina ua alofaina o ia e le Ali'i, ua ia ta'ita'i atu foi ia te ia, ma tu'u atu ia te ia i tua o le 'a'ai.*

#### **FESOASOANI MO FAIAOGA:**

Tamaiti o le mata'upu, o lenei taeao. Ua alofa le Atua ia Lota ma lona aiga. O Lota o le atali'i o le uso o Apera'amo. O ia lava o se tasi o le 'au'aiga o Apera'amo. O le aiga ua silafia lelei e le Atua e talitonu ma fa'atuatua ia te Ia. Sa nonofo i latou i le nu'u o Sotoma. O le nu'u lea sa le fa'alogo ma usita'i i le Atua. Sa fiafia lava i latou e fai le agasala ma lē talitonu i le Atua, ae sa le fiafia le Atua ia latou amio. O lea sa finagalo ai le Atua o le a fa'aumatia ma o'o i ai le malaia (po o le a feoti uma tagata).

Na o'o mai ni tagata se to'alua i le fale o Lota, sa tali lelei e Lota i lona fale. O tagata nei o agelu, sa fa'ailoa atu ia Lota e tatau ona vave o ese mai i lo latou fale.

Sa fa'avave ese loa Lota ma lona aiga agai atu i se a'ai la'itiiti e nonofo ai. Ua lē mafai ona ō i latou i luga o le mauga. Sa nonofo i latou i le a;ai lea ma ua saogalemu ai.

Ia ua fa;asaoina i latou, ua latou iloa foi le alofa o le Atua ia i latou.

**GALUEGA FA'ATINO:** Valivaliga Ata

Saunia kopi o ata e valivali ma ni peni vali e fa'aaoga e tamaiti.

**PESE:** Le Atua e alofa ia Lota,  
Alofa ia Lota ma lona aiga  
Le Atua e alofa ia Lota  
Ioe, Ioe, e moni

(fati: Iesu e alofa i tamaiti)

#### **A'OA'OGA:**

1. E alofa le Atua ia Lota.
2. E fa'asaoina e le Atua tagata lelei.



Lot and his two daughters escaping from the  
cities of Sodom and Gomorrah.  
Genesis 18:16 - 19:30

LSE



**ASO SA:**           **27 NOVEMA 2022**

**MATAUPU:**       **UA TOE FA'AMANUIA LE ATUA IA IOPU**

**SINI:**              Ia malamalama le vsega e i'u manuia le ola onosai.

**TUSI FAITAU:**     Iopu 42: 1 – 17 (mo le Faiaoga)  
                        Iopu 42: 12 – 13 (mo le Vasega)

*Ua sili foi ona fa'amanuia e le Ali'i o le gata'aga o Iopu i lona amataga, aua sa ia te ia mamoe e sefulu afe ma afe e fa, ma kamela e ono afe, ma povi e lua afe, ma asinifafine e tasi le afe. Sa ia te ia foi atali'i e to'afitu ma afafine e to'atolu.*

#### **FESOASOANI MO FAIAOGA:**

Talofa tamaiti, o le tatou mata'upu i lenei taeao, Ua fa'amanuia le Atua ia Iopu." O ai sa fa'alogu muamua i se tala i le toea'ina lea o Iopu. Ia lelei tele e masani lava ona iloa Iopu o se toeaina e onosa'i. O Iopu e tele faigata ma mea tiga sa o'o i ai, aemaise o le ma'i papala sa o'o i lona tino. Ae sa tumau pea lona talitonu i le Atua, ma onosa'i pea e tauivi ma ia tiga. Na silafia (iloa) uma ia faigata e le Atua. Sa ia iloa foi le tumau o le talitonu ma le onosa'i o Iopu.

Sa fa'amanuia le Atua ia Iopu. Sa ia Iopu le tele o lafu manu. O lana fanau, e toafitu ona atali'i ma afafine e to'atolu. E oti Iopu ua selau ma le fa sefulu ona tausaga. O le onosa'i o Iopu ma le tumau o lona talitonu i le Atua lea na fa'amanuia lava i ai le Atua.

**GALUEGA FA'ATINO:** Matamataga Ata


1. Fai ni kopi o le ata o lo o avatu i le mata'upu e matamata ai tamaiti

**PESE: (fati: Misiluki Sua: Tamaiti Samoa faalogo i le musika)**

1. O si toeaina o Iopu, ua maua i le le mautonu  
Ina ua pule Satani lona tino, ma ua fa'atupu ai po'u  
Ae le'i maluelue ai, pe ola fa'avaivai ai  
Ae sa tumau pea lona loto, i le Atua lona matai
2. O le Atua ua silasila. Ia Iopu ua tigaina  
Ave'ese lana fanau toe ave'ese ai ma le tamaoaiga  
Le Atua ua alofa ia Iopu, tumau i lona loto talitonu  
Ua toe fa'aopoopo ai le tamaoaiga o si tama o Iopu

#### **A'OA'OGA:**

1. E manuia le tagata onosai.
2. Ia tumau le ola talitonu i le Atua.



**ASO SA:** **4 TESEMA 2022**

**MATAUPU:** **UA ALOFA IESU I TAMAITI**

**SINI:** Ia malamalama le vasega o Iesu o le uo a tamaiti.

**TUSI FAITAU:** Mareko 10: 13 – 16 (mo le Faiaoga)

Mareko 10: 14 (mo le Vasega)

*A ua silafia e Iesu, ona tiga ai lea o lona finagalo, ua na fetalai atu foi ia te i latou; “Ina tu’u mai ia o tamaiti e o mai ia te au, ‘aua le vavao ia te i latou, auā e fa’apei o i latou nei o e o i le malo o le Atua.*

#### **FESOASOANI MO FAIAOGA:**

Talofa tamaiti, o lea ua tatou o’o mai i le masina mulimuli o lenei tausaga, ae o lo o manuia pea i tatou.

A’o feoa’i Iesu ma lona au-so’o e a’oa’o atu tagata, ma faia galuega fesoasoani i e o lo o mo’omia, a’o feagai Iesu ma ia galuega, sa omai nisi o tinā ma a latou fanau. Sa manana’o i latou e tu’u atu lima o Iesu i luga o tamaiti ma tatalo mo i latou

Sa iloa atu e le au so’o ma taumafai lea e vavao ia i latou, ona o lo o pisi Iesu. Sa lē fiafia nai tinā nei, ona e mamao le mea na omai ai i latou. Na iloa atu i latou e Iesu ma fai atu e tu’u mai tamaiti e omai ia te Ia.

Ua ia fai atu, “Ina tu’u maia o tamaiti e o mai ia te au, ‘aua le vavao ia te i latou, auā e fa’apei o i latou nei o e o i le malo o le Atua. E moni, ou te fai atu ia te outou, ai se le talia le malo le Atua fa’apei o se tamaitiiti, e le sao lava ia i ai.” Ona ia si’itia lea o tamaiti i ona lima ma fa’ae’e ona a’ao (lima) i luga ia te i latou, ma fa’amanuia ia te i latou.

Ia tamaiti, o le tatou tala lena. E alofa Iesu i tamaiti uma lava, ma o Ia foi o le tatou uo.

#### **GALUEGA FA’ATINO:**

1. Matamataga Ata:

- (a) Fai ni kopi o le ata o lo o i le mataupu e ave mo tamaiti.
- (e) E mafai foi ona tofi ni tamaiti e fa’amatala le ata.

**PESE:** Iesu e alofa i tamaiti  
Tamaiti uma o le lalolagi  
Enaena, mumu, uliuli, paepae  
E alofa Iesu i tamaiti

Jesus loves the little children  
All the children of the world  
Brown, red, black and white  
Jesus loves the little children

## A'OA'OGA:

1. E alofa Iesu i tamaiti.
2. O Iesu o le uo a tamaiti.





**ASO SA:** **11 TESEMA 2022**

**MATAUPU:** **O LE ALOFA SILISILI O LE ATUA**

**SINI:** Ia malamalama le vasega e leai se isi alofa e sili atu i le alofa o Iesu.

**TUSI FAITAU:** Luka 2: 8 – 13 (mo le Faiaoga)  
Luka 2: 10 (mo le Vasega)

*Ona fai mai lea o le agelu ia te i latou, ‘Aua tou te matatau, auā fa’auta ou te au mai ia te outou le Tala Lelei o le olioli tele e o’o mai i le nu’u uma, auā o le aso nei ua fanau ai ia te outou i le a’ai o Tavita le Fa’aoala, o Ia o Keriso le Ali’i.’*

**FESOASOANI MO FAIAOGA:**

Tamaiti, o le tatou mata’upu i lenei taeao, “O le alofa silisili o le Atua.”

O le a foi se mea taua, e tupu i le masina lenei. Ioe, e tele lava mea ae e i ai lava le mea e sili ona tatou fiafia ai, pe a tu’ua foi aoga. Ia o le aso Kirisimasi. O le a foi le taua o le aso lea. Ia o le aso fanau o le tatou Ali’i Fa’aoala o Iesu.

Fai mai a’o i ai leoleo mamoe i le leoleoina o lafu mamoe. Sa fa’afuasei ona susulu mai se malamalama ma tu mai se agelu. Sa fa’ateia i latou, i lea va’aiga. Ona latou fa’alogoina lea o le leo o le agelu ua fa’apea mai; ‘Aua tou te matata’u auā fa’auta, ou te au mai ia te outou le Tala Lelei o le olioli tele e o’o mai i le nu’u uma, auā o le aso nei ua fanau ai ia te outou i le a’ai a Tavita le Fa’aoala, o Ia o Keriso le Ali’i.

Sa fa’ailoa atu i ai e le agelu, ua fanau Iesu i le fale o manu. Sa latou va’aina foi ua fa’atasi mai isi agelu e tele, ua latou vivi’i ma pepese. O se va’aiga fiafia lea ua va’aina e le au leoleo mamoe. Ona latou o ai lea i Petele’ema. E sa’o lava ua fanau mai le Pepe o Iesu.

Ia tamaiti, o le alofa silisili lea o le Atua ia i tatou, o Iesu lo tatou Fa’aoala.


**GALUEGA FA’ATINO:**

Matamataga Ata: Fai ni kopi o le ata ua saunia atu i le mataupu  
Tufa i le vasega ata, ma tu’u le avanoa i tamati e fa’amatala ai.

**PESE:** Pese Kirisimasi (Usu se pese Kirisimasi ua maua lelei i le Aoga Aso Sa)

**A’OA’OGA:**

1. E silisili ese le alofa o le Atua mo i tatou.
2. O le pepe o Iesu o le alofa sili lea mo i tatou.



*For unto you is born this day  
in the city of David a Saviour,  
which is Christ the Lord.*

*Luke 2:11*



Tidings Of Great Joy

John Millar Watt

**The angel said to them,  
“Fear not. Behold, I bring  
you tidings of great joy  
that shall be to all people.”**

Luke 2:10

[Knowing-Jesus.com](http://Knowing-Jesus.com)